

本經序疏要

本

經

序

疏

要

鄒澍序

貞白先生名宏景梁時隱居茅山自號華陽隱居  
實始集別錄附入本草經中徐氏名之才北齊尚  
書令封西陽王著藥對蘇氏名恭顯慶中與長孫  
無忌許敬宗等修定本草李勣表上之今名唐本  
草韓氏名保昇孟蜀重廣唐本草并稍增注釋名  
蜀本草掌氏名禹錫宋嘉祐時奉詔重修本草名  
嘉祐補注本草唐氏宋大觀時蜀人取諸家本草  
彙而集之竝采入經史中言醫事隨類附入名證  
類本草

本經序疏要目錄

卷一

療風通用一

風眩二

頭面風三

中風腳弱四

久風溼痺五

賊風攣痛六

暴風瘙癢七

傷寒八

大熱九

勞復十

溫瘧十一

卷二

中惡十二

霍亂十三

轉筋十四

嘔啞十五

本經序疏要  
大腹水腫十六

腸澼下痢十七

大便不通十八

小便淋十九

小便利二十

溺血二十一

卷三

消渴二十二

黃疸二十三

上氣欬嗽二十四

嘔吐二十五

痰飲二十六

宿食二十七

腹脹滿二十八

心腹冷痛二十九

腸鳴三十

卷四

心下滿急三十一

心煩三十二

積聚癥瘕三十三

鬼疰尸疰三十四

參驚邪三十五

癩癧三十六

喉痛三十七

噎痛三十八

卷五

鯁三十九

齒痛四十三

口瘡四十一

吐唾血四十二

鼻衄血四十三

鼻齩四十四

耳聾四十五

鼻息肉四十六

目赤熱痛四十七

目膚瞖四十八

參聲喑啞四十九

面疔炮五十

髮禿落五十一

滅癥五十二

金創五十三

卷六

踈折五十四

瘀血五十五

火灼五十六

癰疽五十七

惡瘡五十八

漆瘡五十九

癭瘤六十

瘦瘡六十一

五痔六十二

脫肛六十三

蠶六十四

虻蟲六十五

寸白六十六

卷七

虛勞六十七

陰痿六十八

陰癘六十九

囊溼七十

洩精七十一

好眠七十二

不得眠七十三

胛痛七十四

婦人崩中七十五

月閉七十六

無子七十七

安胎七十八

墮胎七十九

難產八十

卷八

產後病八十一

下乳汁八十三

中蠱八十三

出汗八十四

止汗八十五

驚悸心氣八十六

肺痿八十七

下氣八十八

蝕膿八十九

女人血閉腹痛九十

女人血氣歷腰痛九十一

女人腹堅脹九十二

解百藥及金石等毒九十三

服藥食忌九十四

凡藥不宜入湯酒九十五

序曰班氏藝文志謂醫經者原人血脈經絡骨髓陰陽表裏以起百病之本死生之分而用度鍼石湯火所施調百藥齊和之所宜經方者本草石之寒溫量疾病之淺深假藥味之滋因氣感之宜辨五苦六辛致水火之齊以通閉解結反之於平蓋自是醫經經方遂分連絡之者本草經則其樞紐矣乃志不載其書然帝紀平帝元始五年徵天下通知逸經古記天

文麻算鐘律小學史篇方學本草及以五經論語孝經爾疋教授者所在爲駕一封軺傳遣詣京師至者數千人樓護傳護少隨父爲醫長安誦醫經本草方術數十萬言世不忽其書故習而傳之者代不乏人其得至今存者惟梁貞白先生陶氏書爲最古今案其書旣歷載本經總序於前復患諸藥一種雖主數病而性理有偏著立方或致疑混赴急抄撮恐不皆得研究故將本經序大病之主已下一節循其所列剖而析之分爲八十三項件繫主治藥於下方贅之序末是陶氏實注本經而得本經與醫經經方連絡交會處矣予治仲景書旣由不明藥物主病之所以

然用力本經有本經疏證續疏之作矣繼治孫真人  
王太守書覺與仲景書猶未相承接遂立志究竟病  
名古今相沿之準病證彼此不侔之故而證以藥物  
主治之由得是編以爲鵠反覆尋繹參互研訂然後  
知一證也隸之此病則屬虛隸之彼病更屬實一藥  
也投之彼病則逐實投之此病反補虛於仲景書以  
此推其緒於孫真人王太守書以此要其歸蓋自是  
而漢人唐人醫學醫經經方旨趣得連爲一貫焉篇  
中附北齊徐氏唐蘇氏蜀韓氏宋唐氏所增其精詣  
幾與陶氏埒而徐氏所續九項實有裨補證明之功  
亦隨例詮釋而不削也道光二十年九月五日武進

本經序疏要卷之一目錄

序例

療風通用一

風眩二

頭面風三

中風腳弱四

久風溼痺五

賊風攣痛六

暴風瘙癢七

傷寒八

大熱九

勞復十

溫瘧十一

本經序疏要卷之一

武進鄒澍學

序例

謹按諸藥一種雖主數病而性理亦有偏著立方之日  
 或致疑混復恐單行經用赴急抄撮不必皆得研究今  
 宜指抄病源所主藥名便可於此處療若欲的尋亦兼  
 易解其甘苦之味可略有毒無毒易知惟冷熱須明今  
 依本經別錄注於本條之下其有不宜入湯酒宜入湯  
 酒者亦條於後

唐本以朱點為熱墨點為冷無點為平  
 多有差悞宋人於逐藥之下依本經別  
 錄而  
 注焉

凡藥稟賦絕類則功用廣博然推其端緒要有歸著

譬如麻黃其異在所產之地冬不積雪則其歸著在

鼓發陽氣衝散陰邪故凡束縛難伸之風

賊風

蔽錮

盛熱之寒

傷寒

乍揚更抑之熱

溫瘧

迫隘不順之氣

上氣 欬氣

皆所能療誠得謂一種可主數病矣然不能治筋骨

懈弛之風陽氣漏泄之寒鼓蕩不羈之熱隨火冲逆

之氣稽其效曰出汗亦僅能令霾中見曉不能令早

處致霖曰下氣卻祇能於橫中闢道不能於直下鑿

渠又可謂性理有偏著否耶太陽病項背強几几汗

出惡風者桂枝加葛根湯反無汗惡風者葛根湯用

麻黃不用麻黃其別在汗欬而脈浮者厚朴麻黃湯

沈者澤漆湯用麻黃不用麻黃其別又在脈立方之

日不洞曉是理易致疑混陶氏序肘後百一方云常  
居閑佚乃可披檢方書或從祿外邑將命遐征或宿  
直禁闈晨宵隔絕或急速戎陣城柵嚴阻忽遇疾厄  
拱手相向搢紳君子且然何況貧家野居能不向單  
行經用赴急抄撮以求活此時而欲研究方書探討  
經義證其非是豈特不能且不暇矣爲此編者筆墨  
省減病名旣得原委藥味遂可別擇循證求病因病  
得藥從藥檢宜誠可謂探之囊笥庸豎均可成醫者  
嗟夫世風遞易遵守殊規徒知寒可攻熱熱得療寒  
補概益虛泄能除滿欲適燕而北其轅固不爲非是  
殊不知自吳直往定抵海濱從滇徑徂輒歸西域遂

致軻發坦途詣終茅塞惟古人所指示曲盡攸宜縱使羊腸鳥道循是遄征必可屆四通八達此昔日之僻徑卽今日之廣衢而今日所謂廣衢乃金元已來所別闢也甘苦之義其旨淵微冷熱之宜其情直遂注此於下相得益彰意簡要而用專精矣

療風通用

防風溫。主大風頭眩痛風行周身骨節疼痛煩滿。

防已平溫。療風腫及中風手足攣急。

秦艽平微溫。療風無問久新通身攣急。

獨活平微溫。治中諸風溼冷奔喘逆氣皮膚苦癢。  
藥性

論

芎藭溫。主中風入腦頭痛寒痺。

羌活平微溫。主賊風失音不語多癢血癩。藥性論

麻黃溫微溫。治身上毒風痛痺皮肉不仁。藥性論

蜀本鹿藥溫。主風血去諸冷益老起陽。

天麻平。治諸風溼痺四肢拘攣。

海桐皮平。主要腳不遂頑痺腿膝疼痛。海藥

蚬祁骨痛

威靈仙溫。主諸風宣通五藏去腹內冷滯心隔痰。

水天麻溫

藥對楓香平治癩癢毒臣。

薏苡仁微寒主風筋攣急屈伸不得君。主風溼痺。

下氣

萎蕤平治中風暴熱不能轉動者君

巴戟天微溫治風邪氣君。治一切風日華

側子大熱治溼風大風拘急使。治冷風溼痺大風

筋骨攣急藥性論

鼈頭血治口僻臣論

山茱萸平治風氣臣。主頭風風氣去來鼻塞目黃

耳鳴面皯

淡竹瀝及葉大寒主風癢疾臣又肉木

牛膝平主風攣急君大骨不痛

細辛溫主風攣急君。主風溼痺痛死肌

菖蒲溫君并桂心大熱吹鼻中主風瘖君

梁上塵微寒以小豆大吹鼻中治中風使

葛根平治暴中風臣。治金創中風瘞欲死煮汁飲

葵之口噤不開多服生葛根自愈肘後

白鮮皮寒治風不得屈伸風熱臣。主頭風。治一

天切風痺筋骨弱乏通小腸水氣日華

白薇大寒治暴風熱四肢急滿不知人臣

證類

天薺冬平大寒。主諸暴風溼偏痺強骨髓

附子溫大熱。主脊風寒

杜若微溫。主風入腦戶頭腫痛多涕淚出

麥藁冬平微寒

羚羊角溫應作寒微寒。治一切熱毒風攻注。藥性論主

中風筋攣附骨疼痛生摩和水塗腫上。孟詵

犀角寒微寒。散風毒。藥性論治中風失音熱毒風。日華

藁本溫微寒。除風頭痛。能治一百六十種惡風

白鬼疰流入腰痛冷能化小便通血。藥性論

天雄溫大溫。主大風寒溼痺歷節痛拘攣緩急

黃芪微溫。主大風癩疾。

疾藜子溫微寒。治諸風癱瘍破宿血。藥性論

菴耳實溫葉微寒。主風頭寒痛風溼周痺四肢拘

攣痛惡肉死肌。

菊花平。主四肢游風利血衄。

日華

狗脊平微溫。治男子女人毒風軟腳邪氣溼痺。藥性

論

莽艸溫。主風頭癢可用沐勿令入眼。藥性

柏子仁平。主風溼痺。治風潤皮膚。日華

蔓荊子微寒微溫。治賊風。藥性論

當歸溫大溫。主惡血內塞中風痙汗不出。

烏喙微溫。主風溼寒熱歷節掣引腰痛不能行步。

草薺平。主冷風癢痺腰腿不遂手足驚掣。藥性論

躑躅溫。主賊風在皮膚中淫淫痛。不發口即即檢

欒荊溫。主大風頭面手足諸風。

辛夷溫。主風頭腦痛。風風令平只熱寒無備法

小天蓼溫。主一切風虛羸冷手足痺疼無論老幼

輕重浸酒及煮汁服之

乾蝎溫。療諸風癱瘓及中風半身不遂口眼喎斜

語澀手足抽掣

烏蛇溫。主諸風瘙癢癰皮膚不仁頑痺

天南星溫。主中風除痰麻痺下氣破堅積

烏頭溫大熱。主中風惡風洗出汗除寒溼痺

白花蛇溫。主中風溼痺不仁筋脈拘急

酸棗仁平。主筋骨風研末作湯服之

藥性論

鼠粘子平。除風傷

牛黃平。療中風失音口噤

日華

風痺脚氣

枳殼微寒。○主風癢麻痺通利關節

牡荊子微寒平。○根主心風頭風肢體諸風解肌發

表

唐本引別錄

風之病人也。大率有三。有感而卽發者。有旣入人身盤旋氣血間久乃成病者。有人身陽氣自應風化爲患者。感而卽發如傷寒溫熱時氣等類。是已旣入人身盤旋氣血間久乃成病如風眩頭面風等類。是已此篇大旨爲諸病提綱挈領。獨於人身陽氣自應風化爲病者加詳。何謂人身陽氣自應風化。蓋陰性凝聚陽性發散。陰聚之陽必散之。則陰陽固互相爲用矣。然不有陰氣凝聚陽在內不得出奮擊爲雷霆者。

乎不又有陰氣凝聚陽在外不得入周旋不舍而爲風者乎是故風者陽氣之變眚也其卦爲巽巽者陰初凝而完聚陽始退而矯強強者力不能散聚之紉密聚者偏不受強之提撕於是相搖相曳相摩相盪而周旋不舍焉而抑揚飄驟焉必得雨而風乃息雨固陰陽之既翕而化焉者也故夫人身之陽在上則欲其與陰化而下歸在下則欲其化陰而上出設使在上不與陰化在下不能化陰斯陽亢無以升降於是爲出柙之虎失繫之猿而窮而無歸咆哮狡獪百變不已窺篇中大意陽之鬱者伸之陽之勁者緩之陰之結者破之陰之竭者濡之隨其所在而澤陽因

其所近而招陰增膏以定火之炆漑水以拯木之枯  
總不出用陰和陽一語就病以徵藥卽藥以審病紛  
紜膠擾之中未始不可隨處洞徹源委也

風眩

菊花平。主風頭眩腫痛目欲脫淚出

飛廉平。主頭眩頂重

躑躅溫

虎掌溫微寒。主風眩。主風眩目轉藥性論

杜若微溫。主風入腦戶頭腫痛多涕淚出眩倒目眈

眈

茯神平。療風眩風虛

茯苓平

白芷溫。主頭眩目癢

鳴頭平。主頭風眩顛倒癩疾

蜀本伏牛花。主風眩頭痛

藥對芎藭溫臣

防風微溫。主頭眩顛倒火風溼痺。臣。主大風頭痛

惡風

人蔘微溫。主頭眩轉君

兔頭骨平。臣。主風眩巔疾

證類蔓荊實微寒。主風頭痛腦鳴目淚出

薯蕷溫平。主風頭眼眩

尢溫。主風眩頭痛目淚出

蕪無溫。頭中久風風眩

陽在上不與陰化在下不能化陰均之風也何以在下之風有腸風胃風則爲飧洩也又有風秘風燥則爲便艱也在上之風有卒仆無知痰涎湧逆也又有風頭眩痛涕洟唾淚也此不特有淺深之殊抑亦有開閉之異蓋陰之錮者陽必鬱則陰固背陽而陽亦爍陰也陰之漏者陽必動則陰固背陽而陽復迫陰也故夫閉者益閉開者愈開閉者之致斃是陰竭陽亡開者之及危乃陰離陽決雖然閉之弊斷有甚於開試思風頭眩痛非卒倒無知之輕者乎痰涎湧逆

非涕洟唾淚之甚者乎然參繹前篇與此篇義旨又有以知閉者宜醒陰導陰以濟陽開者宜順陰和陰以平陽爲同中之異矣順陰和陰以平陽柰何試以燭炏則淚垂波蕩則舟旋轉之夫燭炏淚垂者咎在陽而不在陰波蕩舟旋者咎在陰而不在陽但風息則非特燭不炏卽波亦不蕩矣是豈不可并合而論然不有膏不堅而燭垂淚者乎不有水激搏而舟旋轉者乎水激搏而舟旋轉是地勢之傾欹也膏不堅而燭垂淚是氣候之過暖也療風無藉乎崇土此篇偏疊隸以蔓朮薯蕷療風何資於滲利此篇乃竝列以茯神茯苓而菊花之苦平而降蔓荊之辛寒而升

朮之苦溫而守性殊楚越而收淚之功則同其可謂  
順陰氣使就下和陰氣使歸壑平陽氣使甯謐者非  
耶攷仲景治眩多著意於水與飲故苓桂朮甘湯真  
武湯五苓散澤瀉湯均不得謂爲治風則風眩之必  
兼治水從可識矣

頭面風

芎藭溫。除面上游風去來目淚多涕唾忽忽如醉

薯蕷溫平。主頭面游風

天雄溫大熱。療頭面風去來疼痛

山茱萸平微溫。除面上瘡主能發汗

藥性論

莽艸溫

辛夷溫。治面腫引齒痛。

牡荊子溫。

蔓荊子微寒平溫。久服令人光澤脂緻。

藁本溫微溫微寒。長肌膚悅顏色辟霧露潤澤可作

沐藥面脂。

蕪蕪溫。

藁耳溫。

蜀本何首烏微溫。療頭面風。

藥對皂莢溫主風眩使

巴戟天微溫主頭面風君。療頭面游風。

白芷溫主頭面風臣。可作面脂。

防風溫主頭面來去風氣臣

蜂子微寒微溫。主面目黃久服令人光澤好顏色

證類杜若

菴耳實溫葉微寒

頭面風亦在上之風也其主治多用溫升核以陽在上不與陰化之義相悖否夫豈知頭面風固在上其所以然卻在下哉靈樞邪氣藏府病形篇黃帝曰首面與身形屬骨連筋同血合氣天寒則裂地凌冰或手足懈惰然而其面不衣何也岐伯對曰十二經脈三百六十五絡其血氣皆上於面而走空竅其精陽氣上走於目而爲睛其別氣走於耳而爲聽其宗氣

土出於鼻而爲臭其濁氣出於胃走脣舌而爲味其氣之津液皆上燻於面而皮又厚其肉堅故天熱甚寒不能勝之也是豈非其末在上其本在下歟巢氏曰頭面風者諸陽經脈爲風所乘也諸陽經脈上走於頭面運動勞役陽氣發洩腠理開而受風謂之首風是豈非招風取中之故歟觀篇中一則曰游風再則曰去來詎非其病旣不常在亦不竟除來本無期去亦無跡其來也或目淚或涕唾多或忽忽如醉或頭痛或生瘡或腫或不光澤或面目黃色其去也倏然若失則其陽氣暫弛而病生稍張而病罷猶可不使陽化在下之陰令上出而爲光澤脂緻以長肌膚

潤顏色乎是其於風眩一則水乘風以上激一則火  
委頓而不上炎烏可同日語也然機關既在下何以  
不病於下而病於上夫適所謂陽不固而非陽衰陽  
衰則病於下矣然至用天雄不可不謂陽衰是則有  
說焉夫遠行勞力汗出於腎經有明文運動勞役而  
至陽氣發泄不能不謂傷自腎始而陽之發泄有多  
端其已發而未泄者則因其上而越之矣若已發已  
泄繼踵而不止慄悍而難禁者能不按而收之乎若  
發泄過甚根柢將傾者能不因其衰而彰之乎夫固  
難以一途論也充陽以運陰滯散火以靖陽氣息風  
以奠陽位和陰以達陽光名曰治陽實以治陰中之

陽名曰治下實以使自下而上推其變而會其元古  
人之用意密矣哉

中風腳弱

石斛平。主腳膝疼冷痺弱

石鍾乳溫。療腳弱疼冷下焦傷竭

殷孽溫。主腳冷疼弱

孔公孽溫。主腰冷膝痺毒風

藥性論

石硫黃溫。大熱。主腳冷疼弱無力

附子溫。大熱。腳弱冷疼不能行步

鼓寒。主虛勞喘吸兩腳冷疼

丹藹微寒。腰脊強脚痺除風邪留熱

五加皮溫微寒。療躄小兒不能行。女人腰脊痛。兩腳

疼痺。主賊風傷人。輒腳齧腰。

藥性論

竹瀝大寒

大豆平。豆黃主溼痺膝痛。

孟詵

天雄溫大溫。主關節重不能行步。除骨間痛。

側子大熱。風痺歷節。胛脚疼冷。

藥性論木防已平。治攣急。治男子肢節中風毒風不語。

主散結氣擁腫。

藥性論

獨活微溫。主脚弱。主手足攣痛勞損。

藥性論

松節溫。治脚膝弱。主久風風虛脚痺疼痛。

牛膝平。治痛痺。治腰膝軟怯冷弱。

藥性論

證類  
胡麻平

中風腳弱之候與頭面風適相對照其治自應推在上之陽回入陰中以強之已耳乃復列入性寒通利者過半是何故歟夫既曰弱則非拘急攣縮可比卻甚有似於痿既曰腳則非頭項身體盡然又不全係於風何則風性善行不能但駐一處弱者筋弛而不束骨也生氣通天論曰溼熱不攘大筋縲短小筋弛長縲短爲拘弛長爲痿又曰有傷於筋縱其若不容痿論曰心氣熱則下脈厥而上上則下脈虛虛則生脈痿樞折挈筋縱而不任地果爾則行溼以去熱使陰得以上濟通血以導氣使陽得以下蟠而自上下

下之化通矣又烏得但恃引火回陰之一端耶然則直曰痿可矣何得命之曰中風夫風固陰性凝聚陽在外不得入則與之周旋不舍而爲者耳特凝聚之中果何氣哉試思氣交之令天氣迷蒙地氣抑遏土木生潤階礎流漿非陰之凝聚溼與熱耶而旋即雷雨洊至必首御以風是風非溼與熱凝聚而生者耶乃是時也膠柔弦弛任是堅脆之物必轉溼潤焉則所謂中風腳弱非飄揚淒揜之風亦非掀天刮地之風直是醞釀於溼與熱中欲出而未得出欲息而不得息者彼痿則雖間亦有挾溼如所謂肉痿者餘則均係熱灼陰消皮毛血脈肌肉筋膜骨髓直乾枯焉

耳此風與痿之所攸分卽本書不載痿之由已再覈  
篇中凡性溫者所主必云冷云痛間有性平性寒者  
所主亦有疼與冷焉是其轉移陰陽之浮滯散發陰  
陽之抑鬱暢達生氣之畱連撥正經脈之違逆具握  
化機力專效捷自有常理於中而非可以常情測者  
尤宜具眼觀也

久風溼痺

菖蒲溫平。主風寒溼痺。

茵芋溫微溫。諸關節風溼痺痛。

天雄溫大溫。主大風寒溼痺歷節痛拘攣緩急。

附子溫大熱。主寒溼踈痺拘攣膝痛。

烏頭溫大熱。○除寒溼痺。

細辛溫。○主風溼痺痛死肌。

蜀椒溫大熱。○逐骨節皮膚死肌寒溼痺痛。

牛膝平。○主寒溼踈痺。

天蓴冬平大寒。○主諸暴風溼偏痺。

朮溫。○主風寒溼痺。

丹藳微寒。○除風邪留熱。

石龍芮平。○主風寒溼痺心煩邪氣。

茵陳蒿平微寒。○主風溼寒熱邪氣。

松葉溫。○主風溼瘡生毛髮。

松節溫。○主百節久風。

側子大熱。主風痺歷節。

藥對薏苡仁微寒。主中風溼痺筋攣。君。

躑躅溫治風使。主賊風在皮膚中淫淫痛。

柏子仁平。主風溼痺。君。益氣除風溼痺。

獨活微溫治風四肢無力拘急。君。

證類天薶冬平大寒。

菟耳實溫。葉微寒。主風溼周痺四肢拘攣痛。

蔓荊子微寒微溫。主溼痺拘攣。

痺之訓為冷疾。荀子解為溼病。說文則風者其冷溼之。蔽篇注

所化歟。是蓋不然。若本無風而風為冷溼所化。則痺

論不得云有風氣勝者矣。然則此篇但云風溼而不

云寒則寒者得無風溼之所化歟是又不然痺論云  
風寒溼三氣雜至合而成痺則爲病之由固三者兼  
受矣曰雜至謂錯雜而至不拘孰先孰後也曰勝謂  
其氣較之他氣爲盛也曰行曰痛曰著則病之情狀  
已該其中矣然則篇中以緩急淫淫周痺爲風勝以  
拘攣歷節偏痺爲溼勝以痛爲寒勝而治風以散治  
寒以熱治溼以滲可矣何爲乎寒熱雜陳通補互用  
豈痺亦有屬虛屬熱者哉夫風爲陽寒爲陰溼爲陽  
中之陰則邪既有陰陽矣何況人身亦有體質之不  
齊陰陽之偏旺氣候之勝復而感觸動盪於其間豈  
能執一以爲則而無藏府之違從氣血之消長耶故

曰痛者寒氣多也病久入深營衛之行澀經絡不疏  
則不通皮膚不營則爲不仁陽氣少陰氣多與病相  
益故爲痺寒陽氣多陰氣少病氣勝陽遭陰故爲痺  
熱其逢溼甚者陽氣少陰氣盛兩氣相感故汗出而  
濡也又曰痺在於骨則重在於脈則血凝不流在於  
筋則屈不伸在於肉則不仁在於皮則寒具此五者  
則不痛凡痺之類逢寒則急逢熱則縱據此則又豈  
得按其始以定治乎然則何以不及五藏諸痺之治  
夫篇中除煩平喘通利血脈養營定驚伸引筋骨下  
氣止嘔之物亦何嘗闕顧謂不治五藏痺耶或謂仲  
景云風之爲病當半身不遂或但臂不遂者此爲痺

其辨嚴矣何以篇中治痺之物盡治風之物夫此則  
邪之力有大有小耳譬諸寇盜力大者徑情直行無  
敢與忤力小者誘引相得萃於一隅然正其治化之  
端通其出入之道招徠其脅從殲戮其巨魁剿大剿  
小一也焉用別乎特風多猝然而至痺每積漸乃成  
故以久風溼痺標名非謂更有驟風溼痺相對照也

賊風攣痛

茵芋溫微溫○療諸關節風溼痺痛

附子溫大熱○主寒溼踈蹇拘攣膝痛

側子大熱○治冷風溼痺大風筋骨攣急

麻黃溫微溫○主五藏邪氣緩急風脅痛

芎藭溫。主寒痺筋攣緩急。

杜仲平溫。治腎勞腰脊攣。日華

葶藶平。主脊背痛強骨節風寒溼周痺。

狗脊平微溫。主脊背強機關緩急周痺。

白鮮皮寒。主溼痺死肌不可屈伸。

白芨平微寒。主賊風鬼擊痲緩不收。

菴耳溫。主風溼周痺四肢拘攣痛。

豬椒溫。主風寒溼歷節疼。

石斛平。逐皮肌風痺。藥性論

漢防已平溫。主中風手足攣急。

靈樞賦風篇黃帝曰夫子嘗言賊風邪氣令人病今

有不離屏蔽不出室穴卒然病者何也岐伯對曰此皆嘗有所傷於溼氣若有所墮墜惡血留於內而不去卒然喜怒不節飲食不適寒溫不時腠理閉而不通其開而遇風寒則血氣凝結與故邪相襲而爲寒痹其有熱則汗出汗出則受風雖不遇賊風邪氣必有因加而發焉帝曰夫子之所言皆病人所自知也其毋所遇邪氣又毋怵惕之所志卒然而病者何也惟因有鬼神之事乎岐伯對曰此亦有故邪留而未發因而志有所惡及有所慕血氣內亂兩氣相搏其所從來者微視之不見聽而不聞故似鬼神據此則賊風者卒然而發正與風溼痹之積久乃成者相反

矣顧賊風未必盡爲攣急攣急未必盡由賊風則賊風攣急者其如飛尸如鬼擊不假有因卒然而發之攣急歟然前此種種諸風篇未必竟無攣急此篇種種諸證又未嘗皆攣急謂前此諸攣急非卒然而得則可謂今此卒然得者雖不攣急亦得命爲賊風攣急可乎然覈此篇僅痺緩不收皮肌風痺兩者無攣急餘則不可屈伸機關緩急緩急風脅痛關節風溼痺痛皆攣急也矧痺緩不收上明著賊風鬼擊耶惟卒然得者與不卒然得者所主藥物大同小異是則宜參究耳雖然論病則當嚴別所由論治卻宜實據現在使風以陰陽不合化而病者必推前此五載十

年曾患感冒以爲據是猶歷家之推歷元縱有合而無相干涉也但是見氣之壅滯則調其氣見血之泣澀則和其血見痰之涌逆則利其痰見溼之阻礙則行其溼風之由外入者鼓舞元氣以驅而散之風之由內成者提曳陰陽以和而息之縱是驟然而得積久而成能外是哉且前此諸篇有和血者矣有行溼者矣而未宣明其所以然得此賊風篇一證而後所以和血所以行溼乃能瞭如指掌則所謂喜怒不節飲食不適寒溫不時及志有所惡或有所慕檢前此諸篇亦未嘗不有互相脗合者總在臨時進退推移以求其合而無失之拘執無失之附會斯可矣

暴風瘙癢

蛇牀子平○主大風身癢煎湯浴之

藥性論

葫藿溫○主風癢癰身癢溼痺

烏喙微溫○主丈夫腎溼陰囊癢

疾藜子溫微寒○主身體風癢

景天平○主風癰惡癢

茺蔚子微溫微寒○莖主癰癢可作浴湯

青箱子溫寒○主邪氣皮膚中熱風瘙身癢

楓香脂平○主癰癢風癢

藜蘆寒微寒○主頭瘍疥瘙惡瘡

蜀木烏蛇平○主諸風瘙癢疥皮膚不仁頑痺諸風

藥對  
葶藶子寒主暴風使。主暴中風熱癩癢。

枳實微寒主大風在皮膚中癢君。主大風在皮膚

中如麻豆苦癢

殼莖主身癢癩煮水洗臣

證類  
枳殼微寒。主風癢麻痺

仲景云太陽病得之八九日如瘧狀發熱惡寒熱多  
寒少脈微面反有熱色者未欲解也以其不得小汗  
出身必癢又云寸口脈遲而緩遲則爲寒緩則爲虛  
營緩則爲亡血衛緩則爲中風邪氣中經則身癢而  
癢癢又云脈浮而洪浮則爲風洪則爲氣風氣相搏  
風強則爲癢癢身體爲癢癢則爲泄風久爲痲癩氣

強則爲水難以俯仰巢氏云游風在於皮膚逢寒則  
身體疼痛遇熱則瘙癢又云人身皮膚虛爲風邪所  
折則起癰癧據是則風瘙癢證均係營衛有邪或寒  
爲熱折熱爲寒折欲內不得欲出不能故耳夫心主  
營肺主衛熱折者病關於心營故血脈不咸而爲癩  
寒折者病關於肺衛故氣機沸逆而爲水此篇中所  
列除諸治下體溼癢外餘皆行心肺之物矣然行氣  
者倍多利血者絕少則以諸痛癢瘡雖屬心火但癢  
究在皮膚皮膚間氣旣行病氣已難駐趾任是血脈  
間尙有邪氣涌出亦可隨氣而行竟使不能更聚惟  
其瘙癢本涉於陰借陽分爲藏納者則宜從陽分透

達其陰滯以爲埽地無餘之計且病原係暴起則若是者本無多耳要之暴風瘙癢與賊風攣急均是暴病而一病於陽一病於陰病於陰故用搜逐之物多病於陽故用疏利之物多已屬兩相對待又相并而對待夫久風溼痺爲卒然而得積久乃成之規模治風者七篇其脈絡條理如此統會而觀之則非特久暫之分可明卽上下內外之別均瞭如指掌矣

傷寒

麻黃溫微溫○中風傷寒發表出汗去邪熱氣

葛根平○傷寒中風頭痛解肌發表出汗開腠理

杏仁溫○時行頭痛解肌心下惡

前胡微寒。○傷寒寒熱推陳致新

芫胡平微寒。○傷寒心下煩熱諸痰熱結實胃中邪逆

大青大寒。○時氣頭痛大熱口瘡

龍膽寒大寒。○時氣溫熱熱洩下利

芍藥平微寒。○時行寒熱

薰草平。○主傷寒頭痛上氣腰痛

升麻平微寒。○時氣毒癘頭痛寒熱

牡丹寒微寒。○時行頭痛客熱

虎掌溫微寒

朮溫

防已平溫。○傷寒寒熱邪氣利大小便

石膏微寒大寒○時氣頭痛身熱

牡蠣平微寒○傷寒寒熱驚志怒氣

貝母平微寒○傷寒煩熱淋瀝邪氣

鼈甲平

犀角寒微寒○傷寒溫疫頭痛寒熱諸毒氣

羚羊角寒微寒○傷寒時氣寒熱熱在皮膚溫風注毒

毒在骨間

葱白平○傷寒頭痛

豉寒○傷寒頭痛寒熱煩躁滿悶

人溺寒○寒熱頭疼溫氣

芒消大寒○主時疾壅熱

藥性論

生薑微溫。○傷寒頭痛鼻塞

藥對 栝樓寒主煩熱渴發黃臣。○莖葉療中熱傷暑

葱根寒主頭痛發表臣

大黃大寒使。○溫瘴熱疾利大小便日華

雄黃平君

白鮮皮寒主時氣出汗臣。○主時行腹中大熱飲水

大呼欲走

射干微溫治時氣病鼻塞喉痺陰毒使

茵陳蒿平微寒主發黃臣。○通關節去熱滯傷寒用

之拾遺

梔子大寒臣。○主時疾除熱及消渴口乾目赤腫痛

藥性論

青竹筴微寒主頭痛臣。溫氣寒熱吐血崩中筋溢  
寒水石大寒主五內大熱臣。主時氣熱盛五藏伏  
熱胃中熱煩滿止渴

水牛角平主溫病使。療時氣寒熱頭痛

紫草寒主骨肉中痛臣

菴耳微寒臣。主中風傷寒頭痛

孟詵

虎骨平主傷寒。療傷寒溼氣

證類知母寒。療傷寒久瘧煩熱脅下邪氣

半夏微寒。主傷寒寒熱心下堅

仲景纂傷寒論用藥幾至百品今且未得其半果足

盡傷寒之治耶殆有說焉傷寒論是曲鬯其流而此則疏瀹其源也詳傷寒論兼證有風溼痺有風眩有水氣有下利有大便難有小便不利有黃疸有欬逆有痰飲有宿食有腹脹滿有腹中鳴有心下急結有心煩有喉痛有吐血有衄血有耳聾有目赤有瘀血有好眠有不得眠一一推明其傳變之由處以確當之治茲則已各分門類可別尋而得矣惟溯其得之之病曰傷寒曰時行曰中風曰溫疫曰寒熱曰溫瘴曰溫病曰傷暑以別其受病之故而推其始得病時所隸之證曰頭痛曰心下惡曰胷中邪逆曰大熱口瘡曰熱洩下利曰驚恚怒氣曰淋瀝邪氣曰諸毒氣

曰筋溢曰骨中痛以審定其緣何而連引及是以訂其治則而利導其陰陽馴擾其偏駁使不至傳變無方與傷寒論實互相爲用而適相成者也夫以寒遏陽而陽暴張以熱劫陰而陰驟耗當其正氣未動固不難發越其寒以安陽解散其熱以存陰也無如其來也非一途其宅也非一處何況勾引之者藏匿之者皆人身平昔失職之氣血乃相與合從連衡根株蔓引苟不分崑岡玉石直謂將而必誅則旣患病之人其無愆之陰陽有幾能不決裂潰敗哉故據其源令轉相化誘而使滯者開鬱者解外者徹內者通就其素相入而入因其故相和而和於是不相浹者浹

不相容者容以致乎陽能納陰陰能附陽而復其太和焉試覈篇中陳藥凡四十一味其未經傷寒論用者得二十一味參二十一味之性情功用皆在溫暑瘴疫痰溼毒火中與傷寒之源迥別其傷寒論常用而篇中闕如者除諸兼證可別尋主治外皆係溫補填攝之物則亦可悟源異者不可混施以求合流同者不必引繩以致歧六淫之外加二氣之內戾總在直據當時無泥陳迹則揚扞疏濬各盡其長耳謂此篇補傷寒論之闕也可謂此篇闡傷寒論之義也亦無不可

大熱

凝水石寒大寒。○腹中積聚邪氣皮中如火燒

石膏微寒大寒。○口乾舌焦不能息

滑石寒大寒。○身熱洩瀉

黃芩平大寒。○諸熱

知母寒。○消渴熱中

白鮮皮寒。○時行腹中大熱飲水

元藳微寒。○狂邪忽忽不知人

大黃寒大寒。○腸間結熱心腹脹滿

沙藳微寒。○皮間邪熱

苦藳寒。○除伏熱

茵陳蒿平微寒。○除頭熱

鼠李根皮微寒

竹瀝大寒

梔子寒大寒。胃心大小腸大熱。心中煩悶。胃中熱氣。

蛇莓大寒

人糞汁寒

白頸蚯蚓寒大寒。傷寒伏熱狂謬大腹黃疸。

芒消大寒。五藏積聚久熱胃閉。

梓白皮寒除熱使。煎湯洗小兒壯熱一切瘡疥皮。

膚瘙癢

地膚子寒主五內熱利小腹君。主皮膚中熱氣。

小麥微寒主胃中熱使。除熱止躁渴咽乾。

木蘭皮寒主身大熱暴熱面皴臣。主身大熱在皮膚中去面熱赤皴

水中萍寒主暴熱身癢臣。主暴熱身癢下水氣理石寒君。除榮衛中大熱結熱解煩毒

石膽寒主肝藏中熱臣

牛黃平主小兒熱癇口不開君。主驚癇寒熱熱盛狂痊

鈴羊角微寒主熱在肌膚臣

垣衣大寒主發瘡。主暴熱在腸胃

白薇大寒臣。主暴中風身熱肢滿忽忽不知人

景天平主身熱小兒發熱驚氣君。主大熱火瘡身

熱煩邪惡氣

升麻微寒主熱毒君。除心肺風毒熱壅

藥性論

龍齒角平主小兒身熱臣。角主驚癇癰瘕身熱如

火

葶藶寒主身暴熱利小便使。主身暴中風熱痹癢

利少腹

藍葉實寒主五心煩悶君。主天行熱狂

日華

蜣螂寒主狂語頭發熱使。主小兒驚癇癰瘕腹脹

寒熱大人癲疾狂易手足端寒

棟實寒作湯浴通身熱主溫病使。主溫疾傷寒大

熱煩狂

荆瀝大寒主胷中痰熱臣。去心中煩熱小兒心熱

驚癇

拾遺

大熱卽傷寒論所謂身熱不惡寒反惡熱者也果爾則應隸之傷寒不得別爲條目且陽明病雖身熱不惡寒反惡熱其始得之一二日必惡寒也然則諸病皆有熱惟此病之熱獨盛他病不足與侔者方可謂大熱歟果爾則仍應諸病爲綱而熱乃其中一證今觀篇中所主均係熱盛而他病生非他病居先而熱續增也故夫大熱者雖有所在之不同所本之或異然終不惡寒無休息縱兼他病然推其故總由此而累及乃得獨標一目自成一證耳觀夫內有所因而

熱獨著於外外有所因而熱獨逼於內上有所因而熱獨伏於下下有所因而熱獨浮於上雖同爲熱而已各殊其分矣何況內者有在腸在藏在胃在肝在心肺在胃中之異外者有在肌膚有在皮間有身癢有發瘡有肢滿之異上者有頭熱有口乾舌焦之異下者有伏熱有洩澀有大腹黃疸有小便不利之異若不因其輕而揚因其重而減有形者導之於內有邪者瀆形爲汗而但執寒因熱用爲治可乎雖然大熱者火盛也火盛必濟之以水乃篇中病因有緣溼而熱盛者治法有利水而熱除者豈溼與水非但不足息火之怒而反足以資火之燃耶夫水火之相

濟也必其相和而後能相受不和則兩相拒而不相  
下不受則兩相賊而適相殘故病本不盛以相拒而  
增以相賊而劇惟導去其相拒相賊者而病於以減  
焉非反也所謂適事爲故耳然則均之溼熱也水自  
行而火自盛如身熱洩澀者此又何說哉夫身熱洩  
澀者垢汙因熱而積於中也垢汙因熱而積於中則  
澀者非特可滌垢亦且可洩熱乃垢不去熱又不減  
則其故不在流行之水火而在畱著之形質陽無所  
入而轉盛陰無所交而自行故其治必使形質能隨  
氣化而後氣化得行焉又不可與尋常溼熱竝論也  
寒者熱之熱者寒之固經訓也第以謂如火之燠水

水之沃火則非矣何以言之夫人身之陰陽相須以爲生相違而致病設病乎水者以火熯之水未竭則離火而水仍病水已竭則死矣病乎火者以水沃之火未熄則水乾而火仍燃火已熄則亦死矣故治病之道貴乎能使陰陽相入而相濟以成和相入之道無他在乎能與順耳故易大傳曰與入也試覈此篇之旨或全陰以配陽或化陰以從陽或浥水以滋火或迎火以致水陰格陽而陽怒者抉其陰而陽自暢陽蝕陰而陰消者裕其陰而陽自飫甚且引其至故所經行之道而陽通導其至故所舒散之化而陽泰而無一味逆折之意於其間對待而觀之則以熱治

寒之道可知矣推而廣之則宜補而用填塞之方宜泄而行罄盡之計救涸轍之鮒而挾西江之水療七年之病而求三年之艾均可謂不識時宜鹵莽滅裂者矣奈何從事於此者不思絲絲入籠耶或謂陰陽必相入而後得成和是固然矣第相入不徒恃巽順也如易大傳雖以巽爲入春秋傳之入猶可以順釋之歟是何不可之與有夫外之師而克入必其內有豐內之人旣出而復得入必其內有應今試以篇中實證附之外師之入虛證附之出者之入焉有無豐而可攻無應而得還者歟豐者民心之不順其上而固結焉者也應者民心之不忘於我而繫戀焉者也

因其不順而損之因其不忘而益之非與順以入之  
之謂歟說者謂堯舜是順民之心湯武是逆取順守  
然易大傳不又曰湯武革命順天而應人乎是知成  
和必以相入相入必以順也

勞復

鼠糞微寒。○時行勞復

豉寒

竹瀝大寒。○胃中大熱煩悶

人糞汁寒。○時行大熱狂走解諸毒

蜀  
本  
大黃大寒

葱白平

犀角寒

防已平

虎掌溫

牡蠣微寒 ○除榮衛虛熱去來不定

生薑微溫

芒消大寒 ○主時疾擁熱

證類

鼈甲平

苳胡平微寒

麥蘗冬平微寒

差後勞復元氣正傷病體增病自宜益劇則堵禦之

方補救之術應加廣矣奈何仲景弁髦視之寥寥數

則且并陰陽易差後勞復食復之治胥在焉可不謂  
太簡乎殊不知傷寒正病外別六淫內析六經推極  
其變固已毫無罅漏但既係病愈復病則必有復病  
著象故更隨象設法以示人就地剷除之義蓋六經  
正文已要其終此則更原其始耳倘不應時獲驗而  
更變幻披猖不仍有六經正文在乎是篇繼述仲景  
之志剖析仲景之義尤妙在不卽不離間直謂全在  
藕斷絲連草蛇灰綫處遺下陰陽偏勝隨所激動而  
觸發焉故此數味之中汗下清和無非當時對證之  
治而跬步不離病後復病之旨觀其於由痰由溼由  
熱由蔽在氣在血總若因陳幹而發新枝者可不謂

脫胎仲景別樹新義者耶要之復病之流詎止於是  
儻別現他證仍隨證索治可矣

溫瘧

常山寒微寒○溫瘧胷中痰結吐逆

蜀漆平微溫○瘧腹中堅癥痞結

牡蠣平微寒○溫瘧洒洒驚恚怒氣

鼈甲平○溫瘧血痕腰痛

麝香溫○溫瘧辟惡氣

麻黃溫微溫○溫瘧去邪熱氣

大青大寒

防葵寒○溫瘧驚邪狂走

豬苓平○痰瘧利水道

防己平溫○溫瘧熱氣利大小便

茵芋溫微溫○溫瘧發作有時

藥性論

巴豆溫生溫熟寒○溫瘧癥瘕結聚堅積畱飲痰癖

曰頭翁溫○溫瘧狂揚寒熱

女青平○溫瘧辟不祥

芫花溫微溫○鬼瘧

白薇平大寒○溫瘧洒洒發作有時

松蘿平○痰熱溫瘧可為吐湯

蜀本天靈蓋平

蕘花寒○主傷寒溫瘧

茵陳蒿平。主瘡瘧。日華

藥對龜甲平臣。療瘵瘧。

小麥微寒

躑躅溫使。主溫瘧。

白斂微寒。主溫瘧寒熱使。主小兒驚癇溫瘧。

葫蘆根溫使

當歸溫。主瘧寒熱君。主溫瘧寒熱洒洒在皮膚中。

竹葉平。合常山煮。主孩子久瘧極良。雞子黃和常山。

為凡用竹葉湯下。主久瘧。

證類桃仁平。

烏梅平。治瘧方多用之。

雄黃平大溫

菖蒲溫。小兒溫瘧身積熱不可解可作浴湯

莽草溫

曰標溫瘧舉瘧瘧瘧瘧鬼瘧瘧寒熱而胥附焉何也  
夫瘧瘧瘧瘧鬼瘧瘧寒熱之混於溫瘧猶時行溫疫  
瘧熱之混於傷寒矣古人別病極嚴凡相似而析者  
不徒析也必其同中有異不相似而合者不徒合也  
必其異中有同是故傷寒時行溫疫瘧熱之合以其  
皆屬陰陽相拒溫瘧瘧瘧瘧瘧瘧鬼瘧瘧寒熱之合以  
其皆屬陰陽相爭耳夫陰陽相爭則分理其陰陽可  
矣乃劫痰行水利溼之物且居其半何哉殊不知此

正分理陰陽微意所在也素問瘧論大旨邪藏骨髓之中不與陽俱出而隨陰偕行出則并於陽以與陰爭爲熱復入則并於陰以與陽爭爲寒者爲溫瘧陽加於陰陽逐陰行者謂之汗則溫瘧之邪固依水爲行止者也淒愴寒水藏於腠理復感於風雨氣相搏伏衛氣經行之所屆衛氣來先受者先動則風并於水而寒後感者後動則水并於風而熱者爲瘧寒熱必得汗而熱始解則瘧寒熱之邪亦依水爲行止者也特溫瘧之汗當其始瘧寒熱之汗當其終耳靈樞五癰津液別篇謂天暑衣厚爲汗天寒衣薄爲溺與氣則汗與小水本係一氣所化而翕張於外則有去

有來通輸於下則往而不反是治瘧者多半以劫痰  
行水利溼又何疑焉觀篇中卽非劫痰行水利溼者  
其旋轉陰陽每於闔闢翕張之處緩其陽之怒以撓  
陰而於結聚痞滿之中洩其陰之阻以激陽其使外  
達者又每跬步設防俾能出不能復入以就其徹底  
畢達之功其與他外感爲寒熱者界劃分明無少混  
淆是其綱舉目張有條不紊爲何如哉若夫瘴瘧鬼  
瘧卽瘧寒熱之偶兼他癘者瘵瘧卽瘧寒熱之久而  
不已者皆陰陽相爭者之支流餘派如瘴瘧雖亦起  
落有時卽不入焉則以其單熱無寒非陰陽相爭耳  
故斥之

然則明人所創治瘧方謂使邪離於陰陽者非極善之法歟夫其所謂用風藥之甘辛氣清者以升陽氣使離於陰而寒已用苦甘寒引陰氣下降使離於陽而熱已者是使陰陽相離非使邪與陰陽相離也使邪與陰陽相離猶可言人身陰陽可使之相離乎且瘧論明言瘧由暑熱氣藏於營氣之舍寒水氣舍於皮膚之內而其所用甘辛氣清風藥芷胡升麻葛根羌活防風果可使藏於營氣之舍者離乎其所用苦甘寒石膏知母甘草粳米果可使舍於皮膚之內者離乎吾正恐其在外之陰邪愈加蔽痼在內之陽邪益難升發兩氣互阻馴至寒不成寒熱不成熱決裂

潰敗耳烏得云極善之法哉嗟嗟土苴古法芻狗經  
方非一日矣太陽病得之八九日如瘧狀發熱惡寒  
熱多寒少一日二三度發身癢者與桂枝麻黃各半  
湯服桂枝湯後形如瘧日再發者汗出必解宜桂枝  
二麻黃一湯之文何嘗不在傷寒論何嘗不使邪氣  
與陰陽相離芫胡去半夏加栝樓根湯治瘧病發渴  
亦治勞瘧芫胡桂枝乾薑湯治瘧多寒微有熱或但  
寒不熱之文何嘗不在金匱要略亦何嘗不使邪與  
陰陽相離擴而充之則皮膚之內邪氣盛者大小芫  
胡芫胡桂枝小芫胡加芒消加龍骨牡蠣亦何者不  
可用子每於瘧來時先嘔者用半夏瀉心吐瀉交作

者用生薑瀉心芻痞下利者用甘草瀉心汗多腹脹  
滿者用厚朴生薑甘草半夏人蔘腹滿痛者用桂枝  
加芍藥皆應如桴鼓若更參此篇以逗引其陰陽抉  
摘其巢窟當益便利如指而必杜撰成方以示古法  
經方之可唾棄耶且夫邪之陰陽與人身之陰陽不  
能不相從猶水之必流溼火之必就燥不能強之使  
違也况邪能與陰陽相并而爲旋轉之樞耶相并者  
能相入也能相入原係人身陰陽生化之機故瘧雖  
久多不致死特能相入而不能相和故每連月浹旬  
不能驟解以其開者自爲開闔者自爲闔而不能相  
顧耳倘使闔中有開能拒邪而不拒正開中有闔能



本經序疏要卷之二目錄

中惡十二

霍亂十三

轉筋十四

嘔哕十五

大腹水腫十六

腸澼下痢十七

大便秘通十八

小便淋十九

小便利二十

溺血二十一

小野探二十

瀧血二十一

大野探十八

小野探十六

大野探十六

瀧探十六

轉探十四

瀧探十五

中探十二

瀧探十三

大野探要卷之二 目錄

本經序疏要卷之二

武進鄒澍學

中惡

麝香溫○中惡心腹暴痛脹急痞滿

雄黃平寒大溫○中惡腹痛鬼疰

丹沙微寒○中惡腹痛毒氣

升麻平微寒○中惡腹痛

乾薑溫大溫○中惡霍亂脹滿

巴豆溫生溫熟寒

當歸溫大溫○中惡客氣虛冷

芍藥平微溫○中惡腹痛腰痛

吳茱萸溫大熱。中惡心腹痛逆氣。

鬼箭寒。中惡腹痛。

桃梟微溫。中惡腹痛殺精魅。

桃皮平。中惡腹痛胃中熱。

桃膠微溫。中惡疰忤。

唐本

烏頭溫大熱。

烏雌雞血平。中惡腹痛。

蜀海桐皮平。主霍亂中惡。

肉豆蔻溫。主中惡冷疰嘔沫冷氣。

蓬莪茂溫。主心腹痛中惡疰忤鬼氣。

藥對 牛黃平君。主卒中惡。

芎藭溫臣。主中惡卒急腫痛。

苦蕒寒君。主中惡腹痛。

藥性論

梔子大寒臣。主中惡通小便。

藥性論

泉耳葉微寒臣。

桔梗微溫臣。主中惡。

桃花平使。治惡氣。

日華

巢氏云中惡者卒然心腹刺痛悶亂欲死也。按此與賊風均為卒發之病。第風係陰陽之偶愆，故鍾於音聲發為飄驟，由腠理入筋脈而阻人營衛，此是陰陽之偏駁，故鍾於臭味發為激射，由口鼻入胃腹而隔人氣血耳。其已中人也，又或為嘔吐，或為腸澀下利。

或爲腹脹或爲霍亂自當各按見證而求治惟或著於陰而錮陽或著於陽而逼陰或著於血而閉氣或著於氣而動血種種不同是以投其間抵其隙或崇陽以化陰或由陰以起陽或通氣以調血或和血以行氣大率用苦辛溫烈爲主治間之推蕩以開其蔽佐之升發以揚其遏率之辟惡以奪其魄雜之調和以緩其急因其欲上而上之因其欲下而下之因其欲外而外之因其欲行而行之盡矣第此與心腹冷痛大同不過彼係積漸而成此由卒暴而得以冷原天地之正氣惡是天地之沴氣正氣與正氣自能彼此相容不久可化乃痛而不已焉則其人正氣之不

足尤盛故治之者多以補而溫。診氣與正氣本不能相入故隨卽激而發病而治之者必相度其勢而疏瀹利導之也。奈何世之診視二者不目爲急痧卽謂爲肝氣急痧則用金石開洩之劑猶可開通閉塞。去穢氣肝氣則用飢餓利氣之物不能去病適以導病游行他所治病貴乎先正病名厥有旨哉。

霍亂

人藪微寒微溫。霍亂吐逆調中。

朮溫。霍亂吐下不止。

附子溫。大熱。心腹冷痛霍亂轉筋。

桂心大熱。霍亂轉筋。

本草綱目疏要 卷二  
乾薑溫大熱。霍亂脹滿。

橘皮溫。氣衝胃中吐逆霍亂止洩。

厚朴溫大溫。霍亂腹痛脹滿。

香薷微溫。霍亂腹痛吐下。

麝舌微溫。主霍亂腹痛吐逆心煩。

高良薑大溫。胃中冷逆霍亂腹痛。

木瓜溫。霍亂大吐下轉筋不止。

蜀本小蒜溫。歸脾腎主霍亂腹中不安。

雞屎白微寒。

菹豆葉。主霍亂吐下不止。

雞舌香微溫。療霍亂心痛。

豆蔻溫。山薑去惡氣溫中。中惡霍亂、心腹冷痛功

用如薑

楠材微溫。主霍亂吐下不止

蓬莪茂溫。主霍亂冷氣吐酸水

肉豆蔻溫。主霍亂中惡冷症嘔沫冷氣

海桐皮平。主霍亂中惡

吳茱萸大熱臣。主霍亂瀉利

藥對證類

丁香。溫脾胃止霍亂擁脹

既云嘔吐而利名霍亂矣復云病發熱頭痛身疼惡

寒吐利者名霍亂是霍亂之證不特吐利必且兼有

表證矣又云利止復更發熱又云卻四五日至陰經

上轉入陰必利又云似欲大便而反失氣仍不利者屬陽明見霍亂之證吐利止後有表證不止者且有實則入陽明虛則入三陰者矣傷寒論霍亂篇寥寥數策而外自三陽內至三陰貫通周浹傳變分明治法詳盡如此何容復贅一辭乃茲篇更以藥二十餘味命爲通治霍亂而仲景所不用者十居其八是果於仲景之書有關會否耶蓋嘔吐暨下利有因傷寒而致者有不因傷寒而致者則霍亂亦必如是矣霍亂之有因傷寒而致有不因傷寒而致於何別哉巢氏曰霍亂者揮霍之間便致繚亂也由人溫涼不調陰陽清濁相干亂於腸胃變發則心腹絞痛心痛者

先吐腹痛者先利心腹竝痛則吐利俱發實者身發熱頭痛體痛虛者但吐利而已其別有飲酒食肉腥膾生冷過度者有居處不節者有露臥溼地者有當風取涼風冷襲之者皆歸於三焦傳於腸胃而作也惟此則不特霍亂之或因傷寒或不因傷寒旣可曉然卽此篇藥品所主亦將思過半矣蓋補虛有調中和中之物去實有利氣疏氣之物驅溼有散發滲利之物達外有開拓經絡之物以及解酒辟腥卻寒除水槩欲腸胃間陰陽相順而不相干使廩於三焦輸於膀胱是不特竟霍亂之委抑且徹霍亂之源矣於仲景書又何悖焉

轉筋

小蒜溫

木瓜溫

橘皮溫

雞舌香溫

楠材微溫

豆蔻溫

香薷微溫。轉筋可煮汁頓服半升

孟詵

杉木微溫

菡豆微溫

薑微溫

掌氏曰日本經朱字乾薑溫墨字生薑微溫若從朱字則是乾薑卽不當言微溫若從微溫則是

生薑卽當作墨字然一薑俱不主轉筋難以改正

霍亂有因傷寒而致有不因傷寒而致固然矣轉筋有因霍亂而致有不因霍亂而致亦不易之理也奈何此篇所陳藥品檢覈本經別錄多無主轉筋明文率有主霍亂名目則一似轉筋竝由霍亂來者可乎蓋巢氏之言可徵矣云大吐下後陰陽俱虛血氣皆極則手足逆冷而營衛不理冷搏於筋筋遂爲之轉云足太陽下血氣皆少則喜轉筋喜踵下痛以血氣少則易虛虛而風冷乘之故也是以時俗之發轉筋止有兩端一者由霍亂一者老人夜臥足間不煖而二者之來一係吐下後一係無病又一則足筋轉手

筋亦轉一則及足不及手皎然可辨也惟篇中所列  
祇及霍亂轉筋而不及老人轉筋此則應有說焉夫  
曰冷搏之冷乘之是冷氣能及筋筋畏冷氣爲之絞  
轉非冷能入之也而皆云因血氣之少營衛之虛則  
護衛失於外蔥餒存乎中其情益著矣然其虛也有  
方病方不病之殊方病者摘去其病源病已而轉筋  
不能不已方不病者亦必求其所以虛之由自當覈  
諸虛勞腰痛等篇若以虛勞腰痛等篇煖下補益之  
物混於此中則似霍亂轉筋亦有溫補之治以霍亂  
者必轉筋老人者不皆轉筋故其治自宜畧畫分明  
耳霍亂篇尙兼用補益惟此篇則消暑祛溼溫中利

氣獨不及補益可見霍亂固有因虛而作者第因虛而作者多不必轉筋則此篇雖寥寥數味又豈不足取證於別錄本經豈竟遂無間隙可尋義旨可按耶

厚朴溫大溫。胃中冷逆胃中嘔不止

香薷微溫

麝舌微溫

雞舌香微溫

附子溫大熱

小蒜溫

楠材微溫

高良薑大溫。暴冷胃中冷逆。

木瓜溫。

桂大熱。欬逆結氣擁痹。

橘皮溫。胃中瘦熱逆氣沖胃中吐逆。

蜀本 枇杷葉平。卒腕不止下氣。

麝香溫。

肉豆蔻溫。中惡冷疰嘔沫冷氣。

藥對 青竹筴微寒主腕嘔臣。

蘆根寒生主腕。開胃除噎噦不止。藥性論

通艸平主腕臣。心煩噦出音聲。

生薑莖根汁寒。

證類

人淺微寒微溫。胃脅逆滿。

丁香溫

朮溫

說文玉篇廣韻皆無哕字。哕字始於難經第十六難

曰其病煩心心痛掌中熱而哕有是者心也。滑氏注

云哕乾嘔也。夫哕之義爲乾嘔而此篇之目曰嘔哕

若合爲一貫則嘔哕連稱於義不可通。若分作兩層

剖嘔與乾嘔爲二項則嘔又與下文嘔吐條犯複矣。

諸病源候論嘔之目有六曰乾嘔曰嘔噦曰噦曰嘔

吐曰噫。酢曰惡心。是乾嘔不能與嘔同稱之證。其諸

爲嘔噦之譌歟。廣韻噦字讀呼會切者其義爲鳥聲。

於此無涉讀於月切者其義為逆氣而凡宛傍之黠  
苑字讀於月紆物於歇等切則宛噦以聲相近而為  
省體稔矣况本篇通草下藥對云主宛而別錄則謂  
心煩噦出音聲非確不可移之證耶嘔噦云何巢氏  
曰胃受邪氣則嘔脾受邪氣則脹而氣逆遇冷折之  
氣不通則噦靈樞口問篇曰穀入於胃胃氣上注於  
肺今有故寒氣與新穀氣俱還入胃新故相亂真邪  
相攻氣并相逆復出於胃故為噦是嘔者氣上逆而  
有物噦者氣上逆而有聲或先有聲而繼之以物或  
既有物而復續之以聲者命曰嘔噦何為不可乎以  
是知嘔噦有因氣者有因寒者有因火者有因水者

有因虛者導氣更橫開直降散洩通順之不同逐寒  
又溫中煖下開結通陽之各異至於益津調中以退  
火開解滲利以驅水益氣洩溼以補虛篇中莫不隨  
事而制宜因利而乘便要之皆直揭其原而濬其流  
斯無盛盛虛虛之弊耳傷寒論云傷寒大吐大下之  
極虛復極汗出者以其人外氣怫鬱復與之水以發  
其汗因得噦所以然者胃中寒冷故也云傷寒噦而  
腹滿視其前後知何部不利利之則愈金匱要畧云  
病人胃中似喘不喘似嘔不嘔似噦不噦徹心中憤  
憤然無奈者生薑半夏湯主之云乾嘔噦若手足厥  
者橘皮湯主之噦逆者橘皮竹筴湯主之夫以水火

相軋而病以陰開陽入而愈其常也而不知縷析條分源同派異有如本篇者又焉得不揣切本篇義旨而為仲景擴充微蘊耶

大腹水腫

大戟寒大寒。十二水腹滿急痛

甘遂寒大寒。大腹疝瘕腹滿面目浮腫

澤漆微寒。皮膚熱大腹水氣四支面目浮腫

葶藶寒大寒。邪水上出面目浮腫下膀胱水

芫花溫微溫。消胃中痰水喜唾

巴豆溫生溫熟寒。畱飲痰癖大腹水脹

豬苓平

防已平溫。水腫風腫。

澤蘭微溫。大腹水腫身面四支浮腫骨節中水。

桑根白皮寒。水腫腹滿臚脹利水道。

商陸平。水腫痿痹腹滿洪直疏五臟散水氣。

澤蔞寒。逐膀胱三焦停水。

郁李仁平。大腹水腫面目四支浮腫利小便水道。

海藻寒。腹中上下鳴十二水氣。

昆布寒。十二水腫。

苦瓠寒。大水面目四支浮腫下水令人吐。

小豆平。下水利小便。

瓜蒂寒。大水身面四支浮腫下水。

蠡魚寒。○溼痺面目浮腫下大水。

鯉魚寒。○水腫脚滿下氣。

大豆平。○逐水脹除胃中熱痺。○水合人煎。

堯花寒。微寒。○下十二水利水道。

黃牛溺寒。○水腫腹脹脚滿利小便。

蜀本海松子小溫。○散水氣。○四支醫藥味小對水飲。

藥對香薷微溫主水腫臣。○散水腫。

穀米微寒主逐水腫利小便臣。

通草平主利水腫及小便臣。

麥門冬微寒臣。○身重目黃心下支滿。○諸中水。

椒目寒主除風水滿使。

柳花寒主腹腫使○風水黃疸面熱黑

雄黃平君

白朮溫逐風水結腫君

秦朮微溫主下大水臣

水腫一證支派甚多在素問有腎風風水湧水之別  
在靈樞有膚脹鼓脹腸覃石痕石水之別在金匱要  
畧有風水皮水正水石水氣水血分氣分之別在諸  
病源候論有水分毛水疸水燥水溼水水癥水痕水  
蠱水滯之別今以藥三十三物概之謂可挈其要領  
而盡其變歟是固不可然其命意所在亦實有甚廣  
大而極精微者不可不察也蓋水者節制於肺輸引

於脾敷布於腎通調於三焦膀胱此其分焉者也一處有病則諸處以漸窒礙乃遂成水此其合焉者也自其分者而言則或始於喘呼或始於脛腫或廓於皮膚或充於腸胃或綳急於外而中空或堅結於裏而中實自其合者而言則均之一身支體面目洪腫已矣就其合遡其分而別其勢之靜與動虛與實驗其機之上與下出與入焉以迎而奪之適事爲故非已得其要領遂貫其條目也耶或謂湯液酒醴論所謂開鬼門潔淨府者是治水之大綱詳篇中所列藥品大都皆屬潔淨府而於開鬼門僅畧及焉不可謂偏而不全乎夫論治論藥自是二端無容相混就如

金匱要畧水氣篇何嘗不麻黃桂枝細辛生薑間用  
其黃芪附子甘草石膏芍藥杏仁枳實用之亦不一  
而足又如千金方外臺秘要等以兼喉中鳴而加白  
前半夏兼欬上氣而加五味乾薑兼小便癰閉而加  
石韋兼癥瘕及澀而加麝香牽牛藜蘆苦蕒狼毒烏  
頭野葛雄黃兼滿而加厚朴兼結而加射干兼熱而  
加黃芩大黃用適其當未嘗不奏捷也而目之謂主  
水腫可乎蓋治必以方方必該一病之全藥須求主  
主必抵一病之隙歷繹自唐已前方書固有治水而  
不用此篇之藥者矣未有他證不兼有水而用此篇  
之藥者也則彼此交互之處豈無意義寓於其間乎

水證必小便不利茯苓爲利小便統領本經載之仲  
景遵用之別錄且一謂其主大腹淋瀝二謂其主水  
腫淋結此獨屏不載入豈無故哉夫松當生長之際  
其氣上行則質疏而葉散色青而不彫及斬伐之餘  
其氣下淪則疏變爲堅散變爲整故若松脂之主疽  
瘡松實之主風痺松葉之主風溼松節之主久風皆  
病淫於軀體而不能散者至茯苓之利水則病結於  
中而不能下者觀其上行之氣於色爲青下行之氣  
於色則白青主升而白主降其能利水審矣第茯苓  
之利水固降水之結於中而不下者若水而過顙在  
山汪洋盈溢則非其所能降也篇中諸味所主之證

不曰面目四支浮腫則曰腹滿臚脹急痛盡向上向橫之水是豈茯苓所能利故別錄所列不合之曰大腹水腫而分之曰大腹淋瀝水腫淋結夫淋者小便澇也結則閉而難通瀝則通而不爽大腹則氣盛於水水腫則水盛於氣曰大腹淋瀝見氣不能化水曰水腫淋結見水不從氣化茯苓者專行直道令水道氣通使水隨氣化而下是固的對相符之劑矣而本篇不載非漏也亦非佚也見其所主者淋而非主大腹水腫也若載之豈不嫌於能主上出橫出之水乎是故大腹水腫而淋瀝淋結用之可也不淋瀝淋結用之無益也此其不載之故歟

然則澤蔦猪苓非茯苓儔歟且其經文絕不及大腹  
水腫乃得竝列篇中何也夫水不畏其難於決泄而  
畏其旁溢上出不患其不從陽宣而患其不從陰化  
故凡水病仲景收列之方後人獲效之法用溫用補  
者何限此篇槩不及焉非匿也蓋以日暴水以火熯  
水原夫人知之無煩更諄諄耳良以水體陽而用陰  
性動而好靜試觀天下巨川凡歸壑處必先滙爲大  
浸復束而狹之則其奔流就下自無阻滯不畏其更  
淤濁而淀矣猪苓所治之水平流漶漫不攬亦濁澄  
亦不清者也而欲其從陰化是猶使滙爲澤乃加束  
縛焉以助其湍疾耳是本經利水道之謂也凡水中

有熱則趨下必梗以熱欲上而水欲下也其在人而應之以濁并可見其非特熱不得伸水亦不得升矣惟澤蔦善使水中之氣出於水上氣伸而水亦升水中之精微升則其體質降矣故本經稱之曰消水別錄稱之曰主消渴而更謂爲逐膀胱三焦停水也夫膀胱屬太陽三焦屬少陽少陽爲樞太陽爲開惟陽盛而不開緣樞折而不轉則其所蓄非熱其誰水以熱停而欲逐之自宜先轉其樞樞轉而升降自遂矣要而論之澤蔦所主是水中之氣不化故於大腹水腫爲要劑豬苓茯苓所主是水不從氣化故應次之而茯苓是水蓄於陰不從陽化豬苓是水漫於陽不

從陰化以兩者相較則不從陽化者其常不從陰化者其變以是常者可畧變者不應畧耳

腸澼下利

赤石脂。腹痛洩澼下利赤白

龍骨平微寒。泄利膿血

牡蠣平微寒。澀大小腸止大小便

乾薑溫大熱。腸澼下利

黃連寒微寒。腸澼腹痛下利

黃芩平大寒。腸澼洩利逐水

當歸溫大溫。止利腹疼

藥性論

附子溫大熱。下利赤白

禹餘糧寒。○煩滿下赤白小腹痛結煩疼

藜蘆寒微寒。○洩利腸澼

檉木寒。○止洩利

雲實溫。○洩利腸澼

礬石寒。○寒熱洩利白沃

阿膠平微溫。○療風止洩

熟艾微溫。○止赤白利

陟釐大溫。○溫中消穀強胃氣止洩利

石硫黃溫大熱

蠟微溫。○下利膿血

白蠟。○久洩澼後重見白膿

烏梅平。除冷熱利。

石榴皮平。療下利。

積實寒。微寒。止利。

蜀使君子溫。療溼利。

金櫻子平溫。療脾洩下利。

藥對 白石脂平主水利臣。止腹痛下水小腸澀熱澹便。

膿血。

牛角鯁溫治利臣。止冷利瀉血。

藥性論

滑石寒主澀下君。身熱洩澀。

地榆微寒止血利。

桂心大熱主下利君。

吳茱萸大熱主冷下洩臣

鯽魚頭溫主下利。作鱠主久赤白利

厚朴溫主下洩腹痛臣。洩利

白朮溫主胃虛冷利君

蜜平主赤白利君。止腸澼

龜甲平主下洩臣。漏下赤白

久蜺穀寒主下利使

薤白主下赤白利臣

白頭翁溫主毒利止痛使

猬皮平主赤白利臣。腸風瀉血

蚺蛇膽寒主下蠹蟲使

本草綱目卷二  
柏葉微溫主血利君

蒲黃平主下血臣

小豆花平主下利使

麴溫主腹脹冷積下利臣。消穀止利

豬懸蹄微寒主下漏洩使

雞子平主下利。卵白主小兒下洩

貝子平主下血

白蘘荷微溫主赤白利臣

葛穀平主十年赤白利臣

赤羊脂溫主下血臣。合腎爲羹療勞利

唐本

從蓉微溫主赤白下利臣。除膀胱邪氣腰痛止利

赤白花鼠尾草微寒主赤白下利使。下利膿血不

止白花者主白赤花者主赤

證類

赤地利平。赤白冷熱諸利

桃花石溫。大腸中冷膿血利

腸澼下利顯不同科釋名云洩利言其出漏洩而利也下重而赤白曰牒言厲牒而難也是一病於通一病夫塞烏得以一物兩縮之耶殊不知塞與通皆由於結陰結而陽不足以破之是以病乎通陽結而陰不足以入之是以病乎塞故治利治澼不容苟同解結闢途仍歸一轍此篇中用溫劑燠寒滯泄劑逐水停所以既堪挽其過通即得開其蔽塞也而其批卻

導窾卻又別有經緯蓋讀傷寒論金匱要畧而知其  
部署分析各有區域焉曰久利曰暴利而已矣治久  
利者烏梅凡是也暴利者復宜分上中下三停所謂  
傷寒服湯藥下利不止心下痞硬服瀉心湯已復以  
他藥下之利不止醫以理中與之利益甚理中者理  
中焦此利在下焦赤石脂禹餘糧湯主之復利不止  
者當利其小便是也合四方一法而本篇原所載藥  
已十得八九矣再覈之以熱利氣利清穀利厥逆利  
既吐且利實結利此中豈復更有餘蘊哉惟一篇之  
中別有所因一證之內更有罅隙故不得不窮其流  
而指以歸束如病在血者及閤闔之不遂者食物之

不化者經道之枯澇者自當各有的對之治焉其他兼外邪者解其表而利自甯因勞乏者補其虛而漏自止則又不待言而可識矣

水利久水利赤利久赤利血利久血利赤白利久赤白痢痢利久痢利此外臺秘要方條目也熱利冷痢溼利此千金方條目也太陽病桂枝證醫反下之利遂不止太陽中風下利嘔逆太陽與陽明合病必自下利太陽與少陽合病下利傷寒發熱汗出不解心中痞硬嘔吐下利陽明少陽合病必下利太陰爲病腹滿而吐食不下自利益甚時腹自痛自利不渴者屬太陰少陰病脈微下利少陰病下利清穀裏寒

外熱厥陰病下之利不止傷寒先厥後發熱而利者必自止見厥復利傷寒始發熱六日厥反九日而利後三日衄之其熱續在者期之且日夜半愈此傷寒論條目也統而繹之一言新久一言冷熱一言表裏其何以合之是篇而使有所適從乎夫是篇者所以盡其常三書者所以極其變無是篇諸藥不足定下利之指歸無三書推原不足知下利之委曲此三書與是篇互相發明還相成就處也至三書旨趣似若猶有歧者然千金不云乎利方萬千撮效七八宏之在人陟釐凡烏梅凡松皮散暴利服之何有不差溫脾湯建脾凡久利得之焉能不愈而陟釐等法載在

熱利溫脾等方隸諸冷利是已可就新久而分冷熱  
矣况在傷寒金匱玄機妙諦如走盤珠毫無窒礙如  
植芎藭逐節生根而其歸著仍有大綱挺然對峙則  
曰自利因下而利也自利者不乘裏不虛因下而利  
者不連表難治何以故曰下利脈沉弦者下重也脈  
大者爲未止脈微弱數者爲欲自止雖發熱不死曰  
下利有微熱而渴脈弱者令自愈曰下利脈數有微  
熱汗出令自愈設復緊爲未解此自利乘裏可治之  
候也曰下利手足厥冷無脈灸之不還反微喘者死  
曰少陰病惡寒身踈而利手足逆冷者不治此自利  
乘裏不可治之候也曰太陽病下之後其氣上沖者

可與桂枝湯如前法曰太陽病下之仍頭項強痛翕翕發熱無汗心下滿微痛小便不利桂枝去桂加茯苓白朮湯主之此雖下而連表之候也曰動氣在下不可下下之則腹脹滿卒起頭眩食則下清穀心下痞曰咽中閉塞不可下下之則上輕下重水漿不下臥則欲蹠身急痛下利日數十行此因下而不連表之候也雖然利之支流庸詎止是如膿血利水飲利寒熱錯雜利熱利協熱利甚者有應下之利且不一端焉何也蓋病之情不一病之變不一病之遷延不一病之駐足不一若因乎熱因乎實而止者不行行者不止以至水不資火火不運水則捨下何以使熱

去而水得溫土水既溫土而火遂暢朗耶夫然故下證多矣多不云急下而惟下利之當下者每稱急下此可憬然悟也若夫以寒已熱以錯雜對待錯雜其理皆甚易明以驅飲除水俾水去而利自止者更不煩言矣

更有一言可明全局者曰千金方之以利屬脾藏也夫脾不爲土乎利者水土之不膠黏也素問經脈別論食氣入胃散精於肝淫氣於筋食氣入胃濁氣歸心淫精於脈脈氣流經經氣歸於肺肺朝百脈輸精於皮毛毛脈合精淫氣於府府精神明畱於四藏氣歸於權衡權衡以平氣口成寸以決死生流轉藏氣

徧沾所合而不及脾腎是可證食入於陰氣長於陽  
矣飲入於胃游溢精氣上輸於脾脾氣散精上歸於  
肺通調水道下輸膀胱水精四布五經竝行合於四  
時五藏陰陽揆度以爲常則獨重脾腎夾輔以肺與  
三焦三焦肺通膀胱之道也而徧行陽道以澤陰是可明飲入

於陽氣長於陰矣故小戴禮郊特牲曰凡食養陰氣  
也飲養陽氣也不可互相發明耶土之於水也能涸  
而後布水之於土也就範而後流猶江河必行於地  
設使地不足以隄水爲受害者固水也受害者其誰耶  
土卑靡則水爲窪積而至盈必潰捨培土何以使之  
相和土剛磽則水不沾洩而無畱必燥捨墪土何以

使之相八大寒凝沍凌結於上土燥於下捨溫煦無從就和大暑溽潤土既饜飮水遂漫溢捨涼肅決難消落此篇中用寒用溫厚土疏土所以竝行不悖至若土之高下驟殊水之奔駛莫挽宜於置閘以蓄之水之衝激所向土之抵禦難周宜於加隄以護之此篇中用濇用固之旨更若土平水漫待涸無期何能不鑿渠以導水低土燥盼澤維艱何能不仰辱爲資此篇中用疏洩用滋柔之方也他如緣蟲聚而水凝流因食滯而水被阻血結亦能致氣濇氣濇遂足離水土之交氣滴亦能致血滴血滴儘足解鍵鏞而潰烏能不一一涉及脾腎哉

大便不通

大黃寒大寒。○蕩滌腸胃推陳致新通利水穀。

巴豆溫生溫熟寒。○蕩練五藏六府開通閉塞利水穀。

道

石蜜平微溫

麻子平。○初食利大小腸久食則否。

陳士良

牛膽大寒。○利大小腸。

藥性論

猪膽微寒

類證 朴消寒大寒。○逐六府積聚結固留癖。

芒消大寒。○五藏積聚久熱胃閉。

大戟寒大寒。○利大小腸。

檳榔溫。逐水除痰癖。

牽牛子寒。治疰癖氣塊利大小便。

藥性論

郁李仁平。治腸中結氣關格不通。

藥性論

以大便不通而用篇中諸味皆可無藉思索立得成驗者豈遂徑情直行竟投之乎抑猶當瞻顧詳審乃用之也予則謂下藥終不可浪投觀仲景諄諄於不可下至反覆煩碎而所謂當下之急下之者脫口而出又若斷不容遲則其故必有在矣夫當下之證莫多於陽明篇以陽明之病爲胃家實正大便不通之謂也然猶汗出多者不可下小便多者不可下不能食者不可下脈緩弱者不可下何况咽中閉塞者不

可下諸外實者不可下。脈浮大者不可下。病欲吐者不可下。諸四逆厥者不可下。面合赤色者不可下。心下硬滿者不可下。又疊載於不可下篇耶。雖然既已識其不可用，卽不失其所當用。故夫大便不通而無以上諸證，旁見側出者，遂徑情直行而用之，何患焉。以是觀之，則篇中所載已覺其謹嚴不苟甚矣。夫推寒蕩熱兩物之雄爽峻健，既已竝峙於前，餘非潤以滑之，則血肉之品，苦以洩之而已。下藥何限，豈獨此區區哉。卽唐氏所續軟堅逐水導氣開結，又豈無功相似性相近者，可以羅列備採耶。太陽病寸緩關浮尺弱，其人發熱汗出不惡寒而渴者，此轉屬陽明也。

小便數者大便必硬不更衣十日無所苦也渴欲得  
水少少與之但以法救之渴者宜五苓散傷寒五六  
日頭汗出微惡寒手足冷心下滿口不欲食大便硬  
脈細者此爲陽微結必有表復有裏也可與小茈胡  
湯陽明病本自汗出醫更重發汗病已差尙微煩不  
了了者此大便必硬故也以亡津液胃中乾燥故令  
大便硬當問其小便日幾行若本小便日三四行今  
日再行故知大便不久出今爲小便數少以津液當  
還入胃中故知不久必大便也仲景於大便不通不  
下之下不治之治如此後人尋思於此而擴充之卽  
此篇治法亦自有在矣

小便淋

**滑石寒**大寒。通九竅六府津液去留結止渴。灸之則

**冬葵子及根寒**。主五癰利小便。時景氣大熱下腹不

**白茅根寒**。利小便下五淋。今為小便澀少以時煎當

**瞿麥寒**。關格諸癰結小便不通。小便澀日三四升今

**榆皮平**。大小便不通利水道。今為小便澀少以時煎當

**石韋平**。五癰閉不通利小便水道。熱日法尚燥感不

**葶藶寒**大寒。下膀胱水伏留熱氣。是以百與小五時

**蒲黃平**。心腹膀胱熱利小便。今為小便澀少以時煎當

**麻子平**。逐水利小便。今為小便澀少以時煎當

**琥珀平**。通五淋。今為小便澀少以時煎當

石蠶寒。主五癰破石淋解結氣利水道除熱

蜥蜴寒。主五癰邪結氣破石淋下血利小便水道

胡燕屎平。破五癰利小便

衣魚溫。婦人疝瘕小便不利又療淋

亂髮微溫。五癰關格不通利小便水道

蜀本林石暖。主石淋水磨服之當得碎石隨溺出

藥對車前子寒主淋。主氣癰止痛利水道小便

茯苓平主淋利小便君

黃芩大寒主利小便臣。逐水利小腸

澤蔞寒主淋利三焦停水君。消渴淋瀝逐膀胱三

焦停水

敗鼓皮平主利小便臣

冬瓜微寒主淋小便不通君。利小便止渴。

桑螵蛸平主五淋利小便臣。通五淋利小便水道。

證類 豬苓平。利水道。

石鷲寒。以水煮汁飲之治淋有效。臣。小便。

海蛤平。治水氣浮腫下小便。

藥性論

木通平。通利九竅。

貝齒平。主五癰利水道。

說者謂靈蘭秘典論言膀胱者州都之官津液藏焉。

氣化則能出矣故利小便者在用溫通以化膀胱之。

氣而巢氏則謂腎虛膀胱熱乃為淋兩說正相歧也。

夫巢氏固云水入小腸下於胞行於陰爲溲便腎氣通於陰陰爲津液下流之道若腑藏不和則腎虛而膀胱熱熱則津液溲便遂數且澀淋瀝不宣故謂之爲淋矣而泰西家則言腎之情熱與溼膀胱之情冷與燥且言腰體之內有一穴以膜皮圍用爲吸取血絡脈絡綁縛絡使溺液流通乃以腰之驅德進於溺液之吸德下至膀胱而瀉焉則出雖由於膀胱而化氣則繫於腎腎之熱溼正所以和膀胱之冷燥且腎曰驅膀胱曰吸則是一藏一府緊相接遞相和者也若驅德不濟吸德遂優於是熱與溼者移於膀胱而道路不順津液內溢故小便如粟狀小腹弦急痛引

臍中以是篇中溫劑竟少而性寒者類以清膀胱之熱平者類以助腎之驅斯亦知彼說雖異而無不可通矣然謂淋家不可發汗發汗必便血何也請卽篇中所列衣魚亂髮論之夫血水同源竝藉心火蒸化其精者行於陰分爲血粗者行於陽分爲溺汗亦心之所布而徵之腎者也故曰腎主五液入心爲汗今心以強迫之劑必欲作汗而徵諸腎腎方困於膀胱之吸而不能驅其何能更輸將不爽於是心暴斂於下膀胱不勝誅求致所聚之熱所蓄之溺竝蒸迫化血下行矣亂髮之用能使水火合德而化氣故血源濬而水自通水道利而血自止衣魚之用能化水

溼於木氣閉塞中使從竅穴而達故去疝痕卽以通水道利水道卽以消疝痕淋家緣發汗而溺血惟以是耳

自其疲罷而言謂之癰自其艱阻而言謂之淋癰罷

病也

說文

淋懍也小便難懍懍然也

釋名

癰之虛者溺多

汗多泣多唾多氣出而不反其實者溺秘汗秘目乾

舌乾氣結而不解此其所以然既見於疏證石韋下

矣而病源復列五淋之目曰熱曰冷曰氣曰沙曰勞

病則似不相兼治則多容相濟者蓋癰之虛近於淋

之勞與熱淋之沙與冷又近於癰之實且兩端皆有

因氣成病者則本篇之竝列五癰五淋非疊出亦非

混淆矣况言治癰之下不言治淋言治淋之下不言

治癰耶惟曰利小便曰利水道曰利小便水道曰逐

曰下則不得不縷析而鬯其義焉夫小便者水道之

委水道者小便之源宜利小便者必源清而委不順

宜利水道者必委道而源不繼利小便水道則通徹

源委之謂也又何難竟其義哉下降平聲也史記陳涉

索隱謂降之也史記酈食其傳逐從也楚詞河伯乘白

馳逐也文選南都賦羣土放逐注流蕩也荀子儒效篇故風之所以不逐者注以是

論之下者因其不順脅之使順也逐者因其無力助

之推送也然則曰通曰利又何以別之夫通者對不

通而言利者能通而不能便利如指也是以篇中凡

言下言通者其物多有力而迅言利言逐者其物多宛轉而和以此權衡藥之緩急卽以此科度病之虛實則爲癰爲淋之差別自明而三焦膀胱之通塞順逆自見矣

素問六節藏象論靈樞終始篇禁服篇咸謂人迎脈大四倍曰格寸口脈大四倍曰關關爲溢陰格爲溢陽人迎氣口脈竝大四倍曰關格關格之脈羸不能極於天地之精則死皆言脈而不言證難經三難曰關以前者陽之動遂上魚爲溢爲外關內格此陰乘之脈也關以後者陰之動遂入尺爲覆爲內關外格此陽乘之脈也三十七難曰邪在六府則陽脈不和

陽脈不和則氣留之氣留之則陽脈盛矣邪在五藏則陰脈不和陰脈不和則血留之血留之則陰脈盛矣陰氣太盛則陽氣不得相營故曰格陽氣太盛則陰氣不得相營故曰關關格者不能盡其命而死此則明其理而猶未言其證仲景曰寸口脈浮而大浮爲虛大爲實在尺爲關在寸爲格關則不得小便格則吐逆跌陽脈伏而濇伏則吐逆水穀不化濇則食不得入名曰關格則言其證矣而與本篇所治尙未盡符巢元方曰關格者大小便不通也大便秘不通之內關小便不通謂之外格二便俱不通爲關格幽於陰陽氣不和榮衛不通故關格則陰陽氣痞結腹

內脹滿氣不行於大小腸則大小便不通又風邪在三焦三焦約則小腸痛內閉大小便不通日不得前後外臺秘要曰集驗云關格之病腸中轉痛不得大小便葛氏云卒關格大小便不通支滿欲死二三日則殺人姚氏云風寒冷氣入腸忽痛堅急如吹狀大小便不通或小腸有氣結如升大脹起名爲關格則詳於證且與本篇之治合矣卻又不及乎脈紛紛諸說遂可聯脈證爲一貫耶自其淺而言則脈較大四倍爲何如狀不能極天地之精爲何如候豈得以大小便不通一節概之殊不知由大小便不通而脹滿由脹滿而大小便益不通上不得入下不得出又安

能呼吸天地精氣以爲生卽葛氏亦謂二三日則殺人又何能更盡其期以死若是猶以爲輕渺必立斃之證乃得爲甚耶雖然此非篇中瞿麥亂髮所治之關格也欲求瞿麥亂髮所治之關格則仲景所論其庶乎蓋寸口之脈浮爲氣虛大爲陽實在上則陽越而氣無以攝在下則氣餒而陽無以洩所謂陽實而不能化氣者也故曰在尺爲關在寸爲格關則不得小便格則吐逆觀乾薑黃連黃芩人瀉之治格卽可以悟治關之法矣而不曰不大便自固與脈偏大四倍已上者異也跗陽之脈伏爲陽鬱濇爲絡虛陽鬱而欲達不得達則吐絡虛而陽不爲之行則腕中乾

而食不得入曰此爲關格則并不重在小便之不利而重在吐逆矣絡虛而氣不行陽實而氣不化其病皆涉於火瞿麥開火之府氣者也亂髮化火之藏氣者也藏氣化則血源濬而水自通火府開則水氣清而火自散故凡兩物之用固在岷之偏大偏小而實不得以四倍已上爲準其效固在通小便又實不得以大小便竝不通爲準且二物於關格之下竝繼以不通字樣則凡篇中別物下言其病曰不通言其效曰通者皆可以關格類推矣

小便利

牡蠣平微寒。澀大小腸止大小便

龍骨平微寒。縮小便。

鹿茸溫微溫。主小便利。

桑螵蛸平。夢寐失精遺溺。

漏蘆寒大寒。止遺溺。

土瓜根寒。止小便數不禁。

雞胫脰微寒。主小便利遺溺除熱止煩。

雞腸草微寒。止小便利。

藥對 菖蒲溫止小便君。止小便利。

菟醬溫主尿不節臣。

證類 山茱萸平。通九竅止小便利。

小便利實該小便多小便不禁小便數遺尿四證而

四證者惟小便數爲有熱餘則皆屬陽衰陽衰之中  
又宜分作兩端如孩提之善遺尿是陽氣之未充也  
老人之苦溺多至夜尤甚是陽之已竭也大抵小便  
者根於腎行於膀胱膀胱者以氣爲用氣盛則中熱  
而有紀律經行者不敢不受其節制氣弱則中寒而  
不能自振經行者遂不受約束直達而過焉是故小  
便數者約束太過也小便利者逕情直行也小便不  
禁者醒而不能約束也遺尿者昏而不能約束也昏  
而不能約束猶可俟醒醒而不能約束則直陽之憊  
矣然此皆常病可於方書覈證檢方以求愈者也此  
篇所載則更有啓發元悟醒惕靈機者在焉篇中大

旨小便之行固恃夫陰陽之相化尤喫緊在土之滲  
滲蓋惟其滲是以精華必畱惟其滲是以形質必去  
惟其當滲是以有藉夫陽惟其當滲是以有藉夫陰  
陰者所以召陽使歸而行所當行止所當止陽者所  
以布陰使漑而內沾五藏外透皮毛且客熱恃陰以  
消孤陰恃陽以化相裒相益以底平成此不更於病  
源千金外臺前加一曳綱振領乎况以水中多節之  
物制水之無節便而不溺之物轉溺而不便之爲病  
引而伸之觸類而長之醫中關鍵不益明瞭哉雖然  
小便利之候不得兼渴也若兼渴則是消渴病而非  
小便利矣

漏盧夫人知其能利水此則曰止遺溺小便利者其  
患必在竅之通此則曰山茱萸能通九竅止小便利  
又通五淋利小便水道者必與遺溺相違惟桑螵蛸  
兩者兼治是焉知其能不適相反耶是三者皆當詳  
其兼證按其氣化而明之夫漏盧春夏色白屆秋變  
黑能化金爲水固治溼熱之物也乃主皮膚熱而有  
惡瘡疽痔溼痺是外之熱不能入內以逐其溼內之  
溼不能及外以和其熱矣膀胱者腎之表而肌膚又  
膀胱之表倘其病表裏不相符而水道不利者是腎  
虛膀胱熱用此正以除表熱而逐裏溼遺溺者是膀  
胱虛冷不能約水用此正以挽外熱歸裏而約水山

茱萸花於仲春實於初夏必屆冬乃成味酸性平是能挽金水以涵木回下降以爲升之物也乃主心下邪氣寒熱逐寒溼痺是取其收中有發發中有收矣而更治頭風風氣去來鼻塞目黃耳聾面皤而遺溺是其一竅過通而諸竅皆閉通其諸竅卽所以治一竅之過通桑螵蛸深秋生子仲夏成形是隨陰之斂謐而藏隨陽之昌熾而出矣本經以通五淋利小便水道列於傷中疝瘕陰痿血閉之下是欲其化陰之斂謐而從陽以出別錄以止失精遺溺列於男子虛損五藏氣微之下是欲其化陽之昌熾而從陰以藏三者雖同工而異調而中實有理焉如此

瀉血 心腹疼痛瀉血 利小便止血消瘀血

戎鹽寒。心腹疼痛瀉血。利小便止血消瘀血。

蒲黃平。利小便止血消瘀血。

龍骨平。微寒。主瀉血。

鹿茸溫。微溫。主瀉血。

乾地黄寒。主瀉血利大小腸。

葱涕平。主瀉血。

牛膝平。逐惡血雷結。藥性論

車前子寒。葉主血。瘕下血小便赤止煩下氣。

柏子并葉平溫。

世之引經義言瀉血者莫不以氣厥論胞移熱於膀胱

膀胱爲據特旣曰癰溺血則屬血淋非但溺血也血淋必溺瀦溺血必溺自如巢氏曰心主血血之行身通徧經絡循環府藏勞甚則散失其常經溢滲入胞而成血淋是熱淋之甚者推其源雖溺血之所由原不外是別其類實通塞之殊致矣然則痿論所謂悲哀太過則胞絡絕胞絡絕則陽氣內動發則心下崩數洩血者可爲經義之準歟是固脈痿之源卻亦溺血之鵠矣然因勞悴而生火與因七情而動陽其所從來縱有久暫之殊而以陽搏陰實無彼此况胞脈者屬心而絡於胞中證旣不能離胞情又不能離熱遂謂其竟相懸絕可乎夫解結釋縛必摘其綱別嫌明

微須窮其目事固有本協黍銖末殊尋丈者此血淋  
溺血證必不可不別而治原無不可相同况溺血已  
久續以急瀉急瀉先愈旋復溺血者甚多耶在此篇  
之理固不必以此而費辭但欲明病之所由然則終  
不得不詳乎此耳蓋血與水本同源而有凝釋之殊  
其不歸經絡而自甘與水爲伍隨其流行坎止者不  
特化源有愆常度必擁衛之土氣受盛之木氣均有  
不循其職焉何但陰陽薄蝕水火迫蕩已哉是故從  
水以凝之從土以浥之從陰以除其熱迫從陽以填  
其漏卮而土浥之中復分從火中使之收攝從水中  
使之和諧兩塗其所以如此者緣靈素於此旣言之

未詳後世復無有推明之者千金外臺雖列多方然亦不述其源惟孫氏於第一方提明房勞傷中尿血夫房勞而致傷中必亦祇係胞脈之不咸彼之悲哀動中者能使胞脈閉而月事不來則此之胞脈開而血常自下者自必因恣樂之過極不參覈至是恐不特不能了此篇之旨即千金外臺諸方亦未能取之左右逢源矣溺血云乎哉

本經序疏要卷二

因得本經經文未悉其意者請看此血淋

本經序疏要卷之三目錄

消渴二十二

黃疸二十三

上氣欬嗽二十四

嘔吐二十五

痰飲二十六

宿食二十七

腹脹滿二十八

心腹冷痛二十九

腸鳴三十

夫物之性，各有所歸。中氣不和，則百病叢生。此之謂也。

動中者，能使臟腑調和，百病不來。此之謂也。

血氣不和，則百病叢生。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

調劑之法，各有其宜。不可不察。此之謂也。

本經月政要卷之三目錄

本經序疏要卷之三

武進鄒澍學

消渴

白石英微溫。主消渴陰痿不足。

石膏微寒。大寒。止消渴煩逆口乾舌焦不能息。

茯神平。風眩風虛五勞口乾。

麥蘗冬平。大寒。虛勞客熱口乾燥渴。

黃連寒微寒。止消渴。

知母寒。主消渴熱中除邪氣。

栝樓根寒。主消渴身熱脣乾口燥短氣。

茅根寒。止渴。

枸杞根大寒。○熱中消渴

小麥微寒。○止躁渴咽乾利小便

箠竹葉大寒。○根作湯益氣止渴補虛下氣

土瓜根寒。○主消渴內痺

葛根平。○主消渴身大熱起陰氣

李根大寒。○主消渴止心煩逆奔氣

蘆根寒。○主消渴客熱止小便利

菰根大寒。○主腸胃痼熱消渴止小便利

冬瓜微寒。○止渴

馬乳冷。○止渴

牛乳微寒。○補虛羸止渴

羊乳溫。潤心肺止消渴。

藥性論

桑根白皮寒。

熱渴水腫。

對藥 茯苓平主口乾君

理石寒主口乾消熱毒君。解煩毒止消渴。

兔絲子平主口乾消渴。口苦燥渴。

牛膽大寒主渴利中焦熱君。口焦燥。

苧汁寒止渴使。漬苧汁療渴。

古屋瓦苔寒主消渴。

兔骨平治熱中消渴臣。

豬苓平主渴利使。

或謂石藥肥甘酒鹽四者皆致消渴隋唐已來巢氏

孫氏王氏言之極詳然咸謂其性熱助火已耳其能  
治致水所難制之火則未及也况釋名云消渴係腎  
氣不周於胃中腎氣不周於胃中豈特火之所爲耶  
予謂四十九難曰腎主五液以布五藏在肝爲泣在  
心爲汗在脾爲涎在肺爲涕自在爲唾則胃中津潤  
所以漑喉舌而滋呼吸者獨非腎之所布乎寶命全  
形論曰鹽之味鹹者以其氣令器津洩夫鹽得水可  
化得火復成此其令消渴在乎合水則行而不畱遇  
火則結而不散矣營衛生會篇曰酒者熟穀之液其  
氣悍以清故能後穀而入先穀而液出此其令消渴  
在乎氣係於上而不去質傾於下而不停矣何況石

藥者入水不濡入火則赤肥甘者遇水便浮著火能  
燃此其蟠踞於人身但應火而不應水且使藏府不  
浥不沾又何論夫周是其涸竭之患豈但胷中蓋將  
徧有焚如之害固非特火之所爲也諸家之論雖詳  
大率巢氏之消渴渴利內消三者最爲明爽曰消渴  
者渴而小便不多也渴利者隨飲卽溲也內消者不  
渴而小便多也今以是篇覈之渴飲而小便不多非  
有所溲卽有所停寒而燥者以治溲於下寒而達者  
以治溲於外散而清者以治停於上寬而利者以治  
停於下者也隨飲卽溲者非四旁不沾卽直道無節  
故凡通內痺行脈絡皆以使其沾厚土氣助薰蒸皆

之經戶頭要 卷三  
三  
以使其節至不渴而小便過利自有小便利篇可按  
然篇中往往列止小便利之物不在小便利篇者豈  
不可彼此參伍求所以分所以合耶若夫不渴不利  
善食易消古人謂之食亦與消渴無涉也

素問氣厥論心移熱於肺肺消心移熱於肺鬲消熱  
能爲消是固然矣寒亦可爲消乎此可證之金匱要  
畧者也假使寒不能消何得治之以八味腎氣凡耶  
曰寸口脈浮而遲浮卽爲虛遲卽爲勞虛則衛氣不  
足勞則營氣竭由是觀之非寒則脈何以遲夫心本  
不任受寒心所謂寒蓋在所主之血脈中其移肺亦  
由榮泛及衛耳且非外中之寒亦非卒受之寒乃陽

氣之不營於外而直升直降於內者也營衛既失其  
樞資稟遂不合度故內而陽氣熾盛常藉水以自救  
外而營衛無所汲引則其水直溜而下且曳一身津  
液并而泄焉故曰肺消者飲一溲二死不治此卽前  
所謂不沾者其於病源實兼渴利內消者也曰趺陽  
脈浮而數浮卽爲氣數則消穀而大堅氣盛則溲數  
溲數則堅由是觀之數熱徵也夫鬲以隔蔽清濁而  
非匿寒藏熱之所心肺以熱相移清道陽氣熾盛遂  
不變化取汁爲赤以分布灑陳而一歸於三焦膀胱  
焉故曰堅數相搏卽爲消渴此卽前所謂不畱其於  
病源則所謂渴利者也統而計之陽宗於心陰根於

腎心所以移寒移熱皆由腎陰不上交於陽而肺遂

失其節宣裒益以底於平是則責之所攸歸耳八味

腎氣凡攝土中水氣以濬陰之源地黃拔土氣最力薯蕷入土中最深

而喜攀磚附石山茶莢於季春結實動水中火氣以

至初冬乃成亦吸土氣以濟水者

振陽之本附子桂枝而使天一之水由下以及上澤瀉由上

以歸下茯苓浮游之火鬱結之血藉此遂周流而不滯

焉牡丹得非能降火升水使兩相濟而稱物平施者耶

有是以通本篇之不逮即由本篇以通仲景之所及

如治消渴之用五苓散豬苓湯白虎加人蔘湯白頭

翁湯其中石膏知母黃連豬苓茯苓固皆列於是矣  
肺消鬲消獨不可由彼而更求於此篇哉

然則食亦可以是篇之義通之乎此則不可郊特  
牲曰食養陰飲養陽藏陰也府陽也氣厥篇論消渴  
之源在五藏食亦之源在六府五藏之不咸則無以  
制通而病反在陽故本篇之藥多主氣而輕清六府  
之不調則無以制藏而病反在陰故聖濟總錄食亦  
諸方多主味而沉著惟其流異是以不可通非特此  
也凡因消渴而致之水氣治法遂絕不同惟其源同  
是以可通凡不與消渴類之強中治法乃殊不異卽  
此可明其指矣

### 黃疸

茵陳蒿平微寒○風溼寒熱邪氣熱結黃疸通身發黃

小便不利

梔子寒大寒。通小便解五種黃病。

藥性論

紫草寒。主心腹邪氣五疸。

白鮮皮寒。主黃疸。

生鼠微溫。

大黃寒大寒。

豬屎寒。主寒熱黃疸溼痹。

瓜蒂寒。療黃疸。

栝樓寒。除腸胃中痼熱八疸身面黃。

秦艽平。差五種黃病。

唐本黃芩大寒。主諸熱黃疸。

證類

牡鼠微寒

小茈胡湯小半夏湯小建中湯瓜蒂散五苓散桂枝  
加黃芪湯豬膏髮煎皆治他證爲本黃疸爲標他證  
愈黃自不能不愈也大黃消石湯梔子大黃湯消石  
礬石散梔子槩皮湯麻黃連軹赤小豆湯則黃疸爲  
本矣而標病猶盛不能竟捨標從本故宜有輔佐以  
擊動其標其本乃能釋也惟茵陳蒿湯乃爲黃疸正  
劑知茵陳蒿湯爲黃疸正劑則身黃如橘子色小便  
不利腹微滿爲黃疸主候發熱不惡寒但頭汗出餘  
無汗齊頸而還渴飲水漿小便不利爲黃疸正因矣  
發熱不惡寒反惡熱是爲陽明病而承氣證爲陽明

病之正出茵陳蒿證則陽明病之對出以一有汗一  
無汗一小便過利一小便不利汗出多小便利所以  
成乎燥汗不出小便不利則本燥末溼所以祇對化  
耳不然凡脈遲食難用飽飽則微煩頭眩小便難縱  
下之腹滿如故必其中先硬後溼非特不能全成燥  
證且駸駸乎將全成溼證者何以亦用茵陳蒿湯耶  
此全從傷寒外邪立論者若更參以金匱雜證則不  
必有外邪但係本燥末溼者均得成黃故夫酒者氣  
燥而質溼受其傷則心中懊懣而熱不能食時欲吐  
遂爲酒疸房勞甚者陰已泄陽不得越遂與已化未  
成之陰精糾結怫鬱於中欲出不得雖微汗出小便

自利而不免薄暮手足中熱膀胱急而爲女勞疸更益之黃汗所謂五疸具矣篇中義旨亦明明推茵陳蒿湯爲督率覈以傷寒金匱所隸治黃諸方無非由此而因候加味合成成方如因懊懣則合入梔子豉小承氣而爲梔子大黃湯因小便不利則合入五苓而爲茵陳五苓散因表利裏實則合入調胃承氣而爲大黃消石湯是也獨調胃承氣湯用水消此用火消更覈消石礬石散亦用火消似其中必有故者蓋火消是曳陰向陽乃攜溼以就燥而散水消是化陰濟陽乃剖燥以凝溼而行於此卽可以悟陽明病之正出對出矣

至於篇中白蘚秦朮栝樓根黃芩仲景雖未嘗用治黃而葛氏肘後孫氏千金王氏外臺諸方多用之揣其意旨亦非貿貿然徒用之而已也蓋於此有以窺黃證之微焉夫黃根於溼熱客於脾胃固不待言矣然非必上罩下承面面周而密圍也定有一端滲泄處焉惟滲泄不敵其搏聚是以蒸鬱而成耳不然則所謂陽明中風衄弦浮大而短氣腹都滿脅下及心痛久按之氣不通鼻乾不得汗嗜臥一身及面目悉黃小便難有潮熱時時噦耳前後腫刺之小差外不解之候何以見不尿腹滿加噦者遂爲不治耶一端滲泄者何如栝樓根之主小便利是其黃必仍小便

通矣黃芩主諸熱黃疸腸澼泄利是其黃必大便泄  
矣白蘚主頭風黃疸是其黃必頭面多汗惡風矣秦  
芫主寒溼風痺是其黃必骨節煩疼矣倘不依證尋  
治馴致病氣連橫不至水氣脹滿不已故曰疸而渴  
者其疸難治疸而不渴者其疸可治蓋疸病至渴則  
溼已盡從熱化薰熨元氣元氣不支求助於水駐見  
水日增而火日熾如潑膏以救燎愈益其不能息耳  
况其病不愈則劇自有定期不容遷延耽緩所謂當  
以十八日爲期治之十日以上瘥反劇者爲難治耶  
十八日者四季土旺用事日數也土之所任僅能及  
此過是以往力遂不勝則將轉移他處而木金水火

皆非藏受溼熱之所無力推傳則土困頓而崩頽矣

曷若及早驗其所向因勢以利導之耶是故頭面汗

多是風舉溼於上則令其沉於下俾其氣徹底而隨

之化焉白藓根藏籜氣骨節煩疼是風拒溼於外則

令其連於內俾其氣疏通而為之化焉秦艽羅紋密

是化風歸水自上下下之治也小便自利者其病不在溼而在熱則

滋化土中之熱使與溼離而自已栝樓根澄之則散

能使土中溼熱離散大便泄利者其熱有所歸緣溼滯之而不

爽則清化腸中之溼使隨熱泄而病除黃芩形如腐

溼故能清利腸中溼熱經方用藥總在定六氣以見病源隨形

色性味以為治則非後世漫云以寒治熱以利泄溼

籠統不切於病機病情毫無關照者比也

黃汗一證自巢氏隸之黃病門後世遂視爲黃病支流據金匱則證鄰於歷節目列於水氣蓋黃病與黃汗本異而末亦不同黃汗與歷節乃異派而同源也何以言之夫黃病之甚動云有麴塵然未聞有能染衣至黃者黃汗則汗本不黃至沾衣乃如漿汁以黃病屬脾家脾爲土土之生物不倚他助黃汁屬心家心爲火火之燔燎必著他物是其一病於肌肉一病於血脈爲殊絕也至其所由然則與歷節竝因汗出入水中如水傷心故黃汗脈自沉歷節脈沉弱黃汗汗黃歷節亦汗黃黃汗發熱歷節亦發熱第歷節支

節疼或疼痛如掣黃汁則僅重而痠歷節身體羸瘦  
獨足腫大黃汗則身體洪腫四支面目皆腫而胷中  
窒不能食反聚痛口多涎暮躁不得眠乃歷節所絕  
無是同爲水傷心而有甚有不甚甚卽所謂小便通  
利上焦有寒者也統三者計之皆爲溼不得泄然惟  
黃病爲尤甚黃病分歧於肌肉歷節分歧於骨節固  
不待言矣乃黃汗既有汗而小便又利獨爲最有去  
路反至化溼成水何也夫水氣亦何嘗不從溼化然  
惟火能爲之宣導則無此弊黃汗者因雖從外及內  
病實從內外出是火之不宣已明著矣况祇有身黃  
之水氣竝無黃汗而身黃水氣而身黃者內本能宣

由外鬱遏不得開故越婢湯中用麻黃黃汗本自有汗且小便利則外本無所阻而內之宣導不力故桂枝加黃芪湯芪芍桂酒湯竝賴有桂枝矣由是言之隸於黃病嫌於末似相同也而殊不同隸於歷節嫌於本相同也而末卻大異何如就證論證隸之水氣之爲愈哉。

上氣欬嗽

麻黃溫微溫。止欬逆上氣。

杏仁溫。欬逆上氣雷鳴喉痹。

白前微溫。胃脅逆氣欬嗽上氣。

橘皮溫。主胸中痰熱逆氣下氣止嘔欬。

紫菀溫。主欬逆上氣胃中寒熱結氣。

桂心大熱。主欬嗽。

欬冬花溫。主欬逆上氣善喘喉痹。

五味子溫。主益氣欬逆上氣。

細辛溫。主欬逆溫中下氣破痰利水道開胃中。

蜀椒溫大熱。主邪氣欬逆溫中。

半夏平生微寒熟溫。主喉咽腫痛欬逆腸鳴。

生薑微溫。主傷寒頭痛鼻塞欬逆上氣止嘔吐。

桃仁平。主欬逆上氣消心下堅。

紫蘇子溫。主下氣除寒中。

射干平微溫。主欬逆上氣喉痹咽腫不得消息散結氣。

芫花溫微溫。欬逆上氣喉鳴喘咽腫短氣。

百部根微溫。主欬嗽上氣。

乾薑溫大熱。胃滿欬逆上氣溫中。

貝母平微溫。欬逆上氣止煩熱渴出汗。

皂莢溫。除欬嗽。

蜀本 蛤蚧平。療欬嗽。

縮沙蜜溫。下氣。

藥對 鍾乳溫主上氣臣。主欬逆上氣。

獺肝平主氣嗽使。止久嗽。

烏頭大熱主嗽逆上氣使。主欬逆上氣消胃中痰。

冷

藜盧微寒主嗽逆使。欬逆洩利

鯉魚平燒末主欬嗽臣。肉主欬嗽上氣黃疸止渴

淡竹葉大寒主嗽逆氣上臣

海蛤平主上氣臣。主欬嗽上氣喘息煩滿

硫黃大熱主氣嗽臣。欬嗽上氣腳弱冷疼無力

上氣者不必欬嗽欬嗽者不盡上氣論欬嗽者何不

但標欬嗽則所謂暴嗽久嗽冷嗽熱嗽呷嗽五藏欬

嗽者咸可隸於其中耶夫諸嗽者欬嗽之支分上氣

欬嗽者肺痿肺癰肺脹支飲風水與欬嗽之竝界也

既云欬嗽則諸嗽原隸於中不因兼標上氣而有礙

已標上氣則肺痿肺癰肺脹支飲風水之稍涉疑似

學者遂不得不細心體究以分析之耳不然金匱要  
畧部分諸病最爲嚴密既有肺痿肺癰欬嗽上氣篇  
矣乃疊出痰飲欬嗽篇耶然則奈何細心體究分析  
之夫風舍於肺其人卽欬是欬嗽主腦也欬唾膿血  
脈數虛者爲肺痿數實者爲肺癰上氣喘而躁者爲  
肺脹欬逆倚息不得臥者爲支飲頸脈動時時欬目  
窠下微腫按其手足上陷而不起者爲風水是欬嗽  
之條目也覈篇中列藥三十味試舉治肺痿之甘草  
乾薑湯灸甘草湯千金桂枝去芍藥加皂莢湯治肺  
癰之桔梗白散葦莖湯治肺脹之越婢加半夏湯小  
青龍加石膏湯治支飲之木防已湯小半夏湯十棗

湯小青龍湯桂苓五味甘草湯及諸加味治風水之  
越婢湯咸藉本篇之味以成方者卻逾篇中三分之  
一卽專主欬嗽上氣縱如皂莢凡射干麻黃湯厚朴  
麻黃湯澤漆湯幾全賴此成方者亦不過得篇中之  
半則諸證之與欬嗽原經界相連犬牙相錯曾謂可  
舍此綱領而徒別其支派耶試再覈之千金如百部  
根湯之治嗽不得臥兩眼突出蜀椒圓之治上氣欬  
嗽杏仁飲子之治暴熱嗽橘皮蘇子煎之治上氣欬嗽  
欬冬圓又方之治三十年上氣欬嗽唾膿喘息不得  
臥鍾乳則欬嗽之支流竟矣更參之外臺如深師麻  
黃湯之治卒嗽延年貝母煎之主暴熱欬深師乾薑

湯之療冷逆欬深師立愈凡欬冬花凡古今錄驗麻  
黃湯之治久欬則欬嗽之派別明矣更參之聖濟如  
紫菀凡之治肺欬丹沙半夏凡之治心欬木乳散之  
治肝欬半夏陳皮湯之治脾欬四味散之治腎欬鹿  
角膠湯之治大腸欬人蔘散之治膀胱欬檳榔凡皂  
莢凡之治三焦欬亦莫不有篇中之物錯雜其間則  
欬嗽之所從駐又瞭然矣不應合而合之足以見病  
源之不異應合而不別足以見病變之非歧明乎此  
篇則欬嗽之主治已彰參乎經方斯欬嗽之分殊有  
在而後欬嗽之爲欬嗽遂無遁情也

然則欬論之義遂可置之勿講歟是又烏可夫肺痿

肺癰支飲卽欬論所謂多涕唾也肺脹風水卽欬論所謂面浮腫氣逆也斯二者皆聚於胃關於肺而本於五藏之邪以傳六府其該甚博其變甚煩不僅肺痿肺癰肺脹支飲風水已也就其初傷在氣久乃涉血筋骸之牽引身體之疼痛甚者爲嘔逆吐衄爲遺矢遺溺是其再變而爲膈噎胃反爲下利洞泄爲霍亂轉筋不難矣特他病則自陽入陰而此獨以藏傳府所宜體究焉蓋論中所謂藏病皆經病府病則入內矣所以然者論中固言之曰皮毛者肺之合皮毛先受邪氣邪氣隨從其合此病從外受者也其寒飲食入胃從肺脈上至於肺則肺寒肺寒則外內合邪

此病從內受者也兩皆歸并於肺故爲肺欬非特此耳其心值夏脾值長夏腎值冬肝值春受邪而肺家適有內受之寒如向所云者當其邪乘脈絡以朝肺因之外內合邪亦能爲欬則心欬脾欬腎欬肝欬作矣故病必關肺病因不必關肺病因必由寒病不盡寒不然欬之淺者惟肺與心宜乎病入未深變化未定寒氣應仍在者而胡爲乎反見唾血及咽腫喉痺諸不盡屬寒之證耶至藏欬不已反移於府者以藏主藏而不瀉其守堅府主瀉而不藏其罅疏病在經絡久而不愈勢必內入內入之始未有不從疏而從堅者故久欬不已至移於三焦則腹滿不欲食飲遂

將移於藏矣不然欬久而成勞瘵者亦豈在經在府之病哉此篇雖無治藏府諸欬明文然有可以意會而得其旨者如降氣者皆治上之劑也守中者皆治中之劑也攝氣者皆治下之劑也散結者皆治心肺之物也聚斂者皆治肝腎之物也通利者皆治小腸膀胱之物也醒豁者皆治胃與大腸之物也卽是以推能謂其與經旨絕不相涉耶

嘔吐

厚朴溫大溫。胃中嘔不止

橘皮溫。下氣止嘔欬

人蔘微寒微溫

半夏平。生微寒，熟溫。○時氣嘔逆。

麥冬平。微寒。○止嘔吐。

白芷溫。○療風邪久渴吐嘔，兩脅滿。

生薑微溫。○止嘔吐。

鉛丹微寒。○主吐逆反胃。

雞子微寒。○鍊之主嘔逆。藥性論

薤白溫。

甘竹葉大寒。○除嘔吐。

旋覆花溫。○開胃止嘔逆，不下食。蜀本藥性論

白豆蔻大溫。○主積冷氣止吐逆反胃。

藥對 附子大熱，主嘔逆使。

# 竹筴微寒主乾嘔臣

同為水穀逆出也吐可植躬嘔須曲脊

釋名嘔偃也將有所吐脊

曲偃也

吐猶器滿而溢毋庸勉強嘔已沸騰於中出反

不易故吐如棄物可隨手拋擲

一切經音義引倉頡篇吐棄也

嘔遭

迫脅必聲揚物先

山海經東山經膏水其中多薄魚其音如嘔注如嘔如人嘔吐聲也

則吐為陰嘔為陽吐有寒嘔有熱吐屬虛嘔屬實矣

然吐非無實熱證但係有因決非自作

如服桂枝湯而吐其後必

吐膿血等證

嘔亦有虛寒證則能自致不關誤治矣

如嘔而嘔

弱嘔而胃滿等證

故曰病人嘔數不消穀引食而反吐者胃

中虛冷故也嘔數且然何況不數曰傷寒發熱嘔不

能食而反汗出濺濺然者是轉屬陽明也有汗如此

何況無汗蓋陽之出多奮迅其所以奮迅則以陰格

之也陰之出多慘慄其所以慘慄則以陽先潰也故

凡嘔而利者無一虛證十棗湯證大既吐且下者無

一實證四逆湯證吳茱萸湯證餘如傷寒三陽證則多嘔而少

吐胃反證則言吐而不言嘔循是以尋其緒餘本篇

所載之物不湛然可明哉特篇中藥物寥寥且大段

治嘔似於兩證偏有側重殊不知嘔吐原有竝見者

如黃連湯證小半夏加茯苓湯證小半夏湯證豬苓

散證大半夏湯證是也今篇中兩證竝提者本有四

味提吐不及嘔者亦有兩味全篇僅臚藥一十五味

則其多寡之間雖似有所偏重然於本書中覈以霍

亂篇治吐下之物於本書外參以治胃反之物則較於嘔翻有若稍羸者惟篇中偏以大溫之附子主嘔逆則其理所當究耳夫此乃在下陰霾陵逼中陽而中陽脆艱震蕩之候也是其證在仲景書曰嘔而衄弱小便復利身有微熱見厥者難治四逆湯主之曰腹中寒氣雷鳴切痛芻脅逆滿嘔吐者附子粳米湯主之此與既吐且利之候正同第彼既下有漏泄則中陽敗散祇能滂沱四潰是證下無漏泄則中陽但上不下猶能沖激作聲用附子者正以散其上逼之陰霾回其離窟之生陽也然四逆湯證與附子粳米湯證又復不同一則在下亦有聲是陽猶能與陰爲

梗故須佐以調和爲一成不敗之計一則小便復利是陰陽不相堵禦故更助以溫守而陽之回不回陰之定不定尙在不可知之天曰難治者以此而其用附子之意則一耳由是言之應用附子之嘔是嘔之敗局用附子治嘔是治之急著遇非常之證自不得以常法禦之固難與凡嘔凡治竝論者也

嘔吐噦自金匱要畧已下皆連綴一處惟茲則剖隸兩篇曰嘔哕曰嘔吐不知者必以爲妄分畛域孰知均胃病也而有脾不濟胃胃不從脾之別焉巢氏曰新穀未及傳化故穀之氣與相干犯胃氣則逆胃逆則脾脹氣逆遇冷折之則噦風邪在胃則嘔膈間有

停飲胃內有久寒則嘔而吐是噦由氣嘔吐由質氣

者應恃脾之磨而消質者應恃胃之輸而化氣不消

是脾不濟胃也質不化是胃不從脾也不然何以噦

僅有聲而嘔吐兼有物耶試以兩篇所列之藥較之

相同者五

厚朴橘皮人藳附子竹筴

嘔啗餘十五味而九物之用

在氣

香薷雞舌香小蒜高良薑桂麝肉豆蔻丁香朮皆用其氣

嘔吐餘十味而七

物之用在味

半夏麥冬生薑鉛丹雞子甘竹葉旋覆花等皆用其味

若然則合

之者以其相類分之者以其相差循軌以導其行溯

流以求其本務欲後人識顛末知嚮方則一也

乾嘔與停飲而吐恰相反對蓋乾嘔有火卻係虛火

停飲有水全非實水故服白通湯後厥逆無脈乾嘔

煩者白通加豬膽汁人尿湯通脈四逆湯證乾嘔者  
加生薑乾嘔吐涎沫頭痛者吳茱萸湯乾嘔吐逆吐  
涎沫半夏乾薑散乾嘔噦手足厥者橘皮湯中風發  
六七日不解而煩有表裏證渴欲飲水水入則吐者  
五苓散欬而嘔渴心煩不得眠者豬苓湯胃反吐而  
渴欲飲水者茯苓澤瀉湯吐後渴欲得水者文蛤湯  
卒嘔吐心下痞膈間有水氣悸眩者小半夏加茯苓  
湯嘔吐穀不得下者小半夏湯嘔吐病在膈上後思  
水者豬苓散胃反嘔吐者大半夏湯夫火不能卻陰  
而反被陰迫逐氣不能化水而反任水停滯是陰陽  
之悖亂水火之相射矣則不得以治嘔常法治之故

破其陰卽以助其陽降其火卽以和其陰化其水卽以調其氣降其氣卽以逐其水迴與篇中之義不相符矣雖然篇中亦何嘗不計及此凡橘皮生薑附子者果何爲而列哉卽水氣一面篇中亦未嘗不思行水下氣芎藭吐本因水自不應濫列多品占水飲地步故將旋覆花半夏二味微逗端倪使人觸類引伸推尋有法庶無越畔之嫌仍得兼濟之益耳識得虛者爲真實者是僞則嘔吐之爲嘔吐全局大抵屬虛間有大黃甘草湯十棗湯大芫胡湯數證自是絕無僅有故曰傷寒嘔多雖有陽明證不可攻吁可畏哉

痰飲

天黃寒大寒○除痰實腸間結熱心腹脹滿

甘遂寒大寒○主留飲宿食

芒消大寒○腹中痰實結搏

茯苓平○膈中痰水

芫花平微寒○除諸痰熱結實

芫花溫微溫○消胃中痰水喜唾

前胡微寒○療痰滿胃脅中痞

朮溫○消痰水

細辛溫○溫中下氣破痰

旋覆花溫○消胃上痰結吐如膠漆心脅痰水

厚朴溫大溫○消痰下氣

人蔘微寒微溫

枳實寒微寒○主胃脅痰癖

橘皮溫

半夏平生微寒熟溫○消心腹脅膈痰熱滿結

生薑微溫

甘竹葉大寒

蕤花寒微寒○療痰飲欬嗽

蜀本威靈仙溫○主心膈痰水

藥對射干微溫主胃中結氣使

烏頭大熱主心下寒冷不下食使

吳茱萸大熱主痰熱腹內諸冷臣

朴消大寒主痰滿停結君

巴豆溫主痰飲畱結利水穀破腸中冷○破畱飲痰

癖

類證  
高良薑大溫

尤潛溪曰穀入而胃不能散其精則凝爲痰水入而脾不能輸其氣則蓄爲飲蓋惟其以穀化故質稠惟其以水化故質稀質稠故能藏寒匿熱而至當用烏頭吳茱萸高良薑蕤花甘竹葉能蘊實釀虛而至當用大黃芒消朴消巴豆厚朴枳實人蔘朮茯苓質稀故能內沉外溢而爲裏堅表腫能徹上徹下而爲眩冒食洩又惟其穀入於陰而以質用故痰每流於隱

水經月正夏 卷三 三

僻而注於窪下水入於陽而以氣用故飲能歸於四  
肢徧於身體此四飲分支惟痰飲可獨當一面而三  
飲者祇可并之而相對待矣雖然痰與飲相殊稱謂  
自應有別測其所當別則似飲可稱水痰不得稱水  
者而曰水走腸間漑漑有聲謂之痰飲可乎夫穀非  
由水調不堪食水非由穀出成痰是其根本原未  
始非水以水呼之又何不可特既化入穀中還從穀  
中化出則其搏引稠黏合爲同類自與未曾經化者  
殊且既有素盛今瘦句寇於其端益可知爲久病而  
非暴病夫暴病何嘗不有痰飲第觀篇中所列茈胡  
前胡細辛生薑威靈仙射干等物又豈久病而成者

所可用耶蓋惟其暴病則水爲火逼而成久病則陰  
隨陽溜而成仲景所謂當以溫藥和之者久病之治  
也篇中所羅性峻刻而注有痰字者則暴病之治矣  
然則篇目雙標痰飲篇中所列備悉搜采本經別錄  
主治但稱飲者止一味痰水痰飲竝稱者僅七味但  
稱痰者至十味不云水飲及痰者七味則偏重於痰  
極矣此又何爲者耶夫飲變見之證極多比連之證  
亦極多凡嘔吐欬嗽上氣大腹水腫皆是也痰則僅  
在是篇若使與諸證諸治相乘除恐反不及飲之多  
矣甯反謂爲少耶

仲景於飲與水分之極嚴呼之甚亂如痰飲篇大半

稱飲爲水是也飲固可呼之爲水耶夫飲本水也特有受約束不受約束之分耳受約束者縱能變化不離眡域不受約束者橫流直衝遇隙卽就故痰飲篇曰水在某水氣篇曰某水明明一指爲注於何藏之水一指爲何藏所發之水矣雖然兩篇之旨猶當更有推明者焉曰水在心心下堅築短氣惡水不欲飲水在肺吐涎沫欲飲水水在脾少氣身重水在肝脅下支滿噓而痛水在腎心下悸曰心水者其身重而少氣不得臥煩而躁其人陰腫肝水者其腹大不能自轉側脅下腹痛時時津液微生小便續通肺水者其身腫小便難時時鴨溇脾水者其腹大四支苦重

津液不生但苦少氣小便難腎水者其腹大臍腫腰痛不得溺陰下溼如牛鼻上汗其足冷面反瘦合而觀之欲飲不欲飲噉悸少氣病皆係於上陰溼陰腫小便難病皆係於下其諸阻於上者謂之飲阻於下者謂之水歟夫上是水之來源下是水之去路來源雖阻去路猶通於何能不受約束濫及他處若來源通而去路塞則時有所益日有所增水從何往而欲其不衝溢他處依規就範得乎是以治水之物通多而化少治飲之物通少而化多檢覈篇中惟芫花甘遂葶花巴豆朮與大腹水腫篇同用其餘則各有所當矣水聚於上而論其欲飲不欲飲水聚於下而論

其津液生不生似甚難解然不知阻於上者欲其化阻於下者欲其通既化既通則清光來而滓穢去夫固曰津液微生小便續通矣是故篇中所具行經絡解客感皆引清光之物也下畱結濬壅淤皆去滓穢之物也

內經未嘗言及痰飲金匱要畧則詳論之矣然及飲多而及痰少千金外臺則已痰飲參半沿至後世乃飲日少而痰日多何哉此又世道升降之會也蓋維元古飲與食庖治無不精詳飲湯飲水各按其時則入陽而資氣化茶蓼稻黍各佐其肉則入陰而養元精傳曰肉雖多不使勝食氣肉中既有食氣勝之矣

於何能入陰而成痰經曰漿入掌其六飲水漿醴涼  
醫醅水中既有冷熱節之矣於何能入陽而成飲中  
古制御多失其方是以痰飲竝興然緣烹茶之度甚  
精則既能導飲不畱復能運食不滯及夫近世茶惟  
點啜則未得其氣之全肉務煎燂則反增其味之厚  
於是水入成飲肉入生痰駸駸乎無病不以是棘其  
治矣况更蕪澹巴菰之葉常吸其煙豈知此實劫飲  
化痰之妙劑哉歷攷經方竝無引飲令吐之法有之  
自金元四家始子和在前專工劫掠景岳繼述稍務  
平和然實爲今日吸煙作俑倘無神聖闡別痰飲界  
域於前勢必將遇痰卽逐試觀今人之痰果堪逐否

耶篇中雖未嘗不用逐而妙在解痰之爲窟容邪去  
痰之連衡痰滯痰隨氣結開氣卽以行痰痰與熱壅  
化痰卽以清熱釋寒之縛痰脫火之膠痰補其虛而  
痰自退舍聽命攻其實而痰自隨跡消除化痰之法  
盡矣學者更能擴充於此而權衡其輕重焉益可不  
治痰而痰自無不順矣

宿食

大黃寒大寒。破留飲宿食蕩滌腸胃推陳致新

巴豆溫生溫熟寒。開通閉塞利水穀道

朴消寒大寒。胃中食飲熱結

芫胡平微寒。去腸胃中結氣飲食積聚

朮溫。消食

桔梗微溫。溫中消穀

厚朴溫大溫。宿食不消

藥性論

皂莢溫。療腹脹滿消穀

麩溫。消穀止利

蘗溫

檳榔溫。主消穀逐水除痰

宿食不徒停也蓋必有所挾焉外臺秘要方目所載

有傷寒宿食不消方有畱飲宿食方有因食飲水上

氣方有食不消成癥積方有積聚宿食寒熱方有食

癥及魚肉成癥方有冷利食不消方有下利清穀方

有下利食完出方大率體氣實者食因病而留病據  
食爲橐體氣虛者食遺病以洩病因食遂殆所以仲  
景書舍攻下溫補無別法獨於差後勞復出一枳實  
梔子豉湯而曰有宿食者加大黃遂可見其因病治  
病卽於中挾入利導之治不別立間架畛域竟指爲  
一病也而今者特建標題爲病綱領何哉推其微義  
蓋亦以經方值此大抵用攻第因病而致食留不去  
病而食可行乎故首列三品原係經方正治無從遺  
漏此外則因邪而結者疏其邪因氣而滯者調其氣  
因肥膩而膠黏者卽爲消其脂膏因痰水而勾留者  
卽爲行其滯蓄甚至折其生氣而使難消者消發其

生氣而使難化者化如麴與蘖者蓋亦神乎治矣於  
此見本書特立是篇正爲別樹一義羽翼仲景救後  
人遇食卽攻之失耳

腹脹滿

麝香溫○中惡心腹暴痛脹急痞滿

甘草平○煩滿短氣

人蔘微寒微溫○胃脅逆滿

朮溫○除心下急滿

乾薑溫大熱○霍亂脹滿

百合平○邪氣腹脹心痛浮腫臘脹痞滿寒熱

厚朴溫大溫○腹痛脹滿

庵闍子微寒微溫。腹中水氣臚脹留熱。

枳實寒微寒。消脹滿心下結痞痛逆氣。

桑根白皮寒。水腫腹滿臚脹利小便。

皂莢溫。療腹脹滿消穀。

大豆黃卷平。五藏胃氣結積。

唐本 卷柏溫。

蜀本 葶澄茄溫。主心腹間氣脹令人能食。

對藥 忍冬溫主腹滿君。主寒熱身腫。

射干微溫主脅下滿急使。散結氣腹中邪氣。

香薷微溫主腹滿水腫臣。

旋覆花溫主脅下寒熱下水臣。主結氣脅下滿。

證類

訶梨勒。主冷氣心腹脹滿下食

草豆蔻

直溢曰滿橫充曰脹皆氣有所向而不遂也脹與弛

對

左成十年脹陷而卒作張

則知其欲寬緩而不能矣滿與減對

則知其欲降泄而不能矣夫氣之濁者不降則清者不升行者不舒則駐者自急故滿多實而脹多虛在仲景書則脹滿而按之痛者爲實不痛者爲虛脹滿而時能減者爲寒不能減者爲熱厚朴生薑甘草半夏人薑湯大建中湯附子粳米湯虛而寒者之治也大承氣湯大芫胡湯厚朴七物湯厚朴三物湯實而熱者之治也本篇意義大旨似異根柢究同觀其言

痛者寥寥而別著心腹冷痛篇是其注意不全在實氣寒氣平者與氣溫者參半是其設法不全在寒如其用百合庵闔桑皮黃卷忍冬香菘旋覆治邪而非偏寒偏熱之邪用麝香皂莢葶澄茄射干訶梨勒草豆蔻行氣而非偏實偏虛之氣獨理中湯全方端然首列則知其病本屬虛而夾輔以枳實之泄滿厚朴之除脹於是唐人之枳實理中厚朴理中都可識經方與是篇恰合之故且行水除痰燠寒清熱備又可見脹滿之因不一而足矣

心腹冷痛

當歸溫大溫○溫中止痛

人蔘微寒微溫。療腸胃中冷心腹鼓痛。

芍藥平微寒。疝瘕止痛中惡腹痛。

桔梗微溫。胃脅痛如刀刺。

乾薑溫大熱。寒冷腹痛。

桂心大熱。腹內冷氣痛不可忍。

蜀椒溫大熱。除六府寒冷。

附子溫大熱。心腹冷痛。

吳茱萸溫大熱。去痰冷腹內絞痛。

烏頭溫大熱。心腹冷疾臍間痛。

芫溫。止嘔逆腹內冷痛。藥性論

甘草平。腹中冷痛。藥性論

礞石大熱生溫熟熱。破積聚痼冷腹痛

蜀本 膈膈大熱。心腹痛

肉豆蔻溫。積冷心腹脹痛

零陵香平。心腹痛滿下氣

紅豆蔻溫。心腹攪痛

胡椒大溫。除藏府中風冷

藥對 芎藭溫臣。諸寒冷氣心腹堅痛

黃芩大寒臣。胃中熱小腹絞痛

戎鹽寒臣。心腹痛

厚朴溫臣。腹痛脹滿

草薺平臣

證類

蒜溫。主霍亂腹中不安。

高良薑大溫。霍亂腹痛。

蜂子平微寒。心腹痛。

蓬莪茂。心腹痛。

心腹冷痛次於宿食腹脹滿之下以金匱要畧原屬一篇也第其目增一心字則似連胷痹之痛者亦在其中中間一冷字則似無與於熱然胷痹之治如栝樓薤白白酒湯栝樓薤白半夏湯桂枝生薑枳實湯凡言痛者皆不於此中取材而不言痛之人淺湯反全數在焉若云無與於熱則黃芩固已列篇中又何以爲解矣殊不知治法固有用熱無犯寒用寒無犯

熱者亦有用熱不遠寒用寒不遠熱者別錄載黃芩之治曰胃中熱小腹絞痛則焉知非胃中之熱不下濟反隔礙腸中之寒致無以泄而痛者卽如脅下偏痛發熱脈緊弦明明已指爲寒謂宜溫藥下之附子細辛已隸方中矣其複用大黃何耶惟其有寒故以熱藥爲君惟其寒爲熱激而痛則以寒藥爲臣藥對於黃芩大寒之下原未嘗不注臣字又何不可用之與有以此觀之凡心腹間以冷而痛者其用藥大旨不出此篇之中胃痺不盡屬寒其屬寒者固宜以此篇之藥爲治寒疝則盡屬寒矣故凡大烏頭煎當歸生薑羊肉湯抵當烏頭桂枝湯大半皆藉此成方不

特是也傷寒於理中湯四逆湯吳茱萸湯當歸四逆湯雖不皆言腹痛惟其所用盡取給於此則亦不能決其必無痛矣豈特規規於腹滿寒疝篇之附子梗米湯大建中湯而後謂此方是腹滿痛證哉腹脹滿與心腹冷痛分隸兩篇原不在屬虛屬實上起見前篇已言之第旣曰冷則其以屬寒屬熱而分不可混矣第兩篇同列之藥偏在理中湯及厚朴豈理中厚朴寒熱均可用者耶夫理中厚朴固不可治熱然所謂胃痺心中痞氣氣結在胃胃滿脅下逆搶心者不知果屬寒否如果屬寒則不得云枳實薤白桂枝湯主之人蔞湯亦主之矣惟其如是是以此篇載之彼

篇亦載之耳蓋有不痛爲虛痛者爲實之言故但脹滿而不痛者焉能無虛證然雖不痛而有水有痰有寒熱有逆氣其中又何能無實證則剋削之物自多用矣虛者比於寒實者比於熱故旣脹滿而復痛者焉能無實證然雖痛而僅係寒冷所爲則不能不直以溫藥逐之而剋削之物自少用矣此其交互之間正兩證之邊際而犬牙相錯者明乎此而後其分其合方有執持也

篇中積藥二十七味註冷者十有三標曰雖曰冷實與不冷者相參半則其章旨重在痛矣痛之分派八論形象者二曰脹滿痛曰絞痛論所在者四曰心

腹痛曰腹痛曰胃脅痛曰臍間痛更有言痛不言處  
言處不言痛二項其大畧可相校也治脹滿痛者三  
味言冷者一治絞痛者亦三味言冷者亦一心腹痛  
七味言冷者三腹痛七味言冷者五胃脅痛一味不  
言冷臍間痛一味言冷言痛不言處四味言冷者二  
言處不言痛一味不言冷足見臍間痛無不因寒腹  
痛因寒者多不因寒者少但言痛及心腹痛則因寒  
不因寒參半脹滿痛絞痛猶間有因寒者惟胃脅痛  
則絕不因寒矣所以然者寒託氣於水故就下則不  
傍撓歸壑則不上激况篇中凡治寒者勢皆向下惟  
芎藭一味兼寓升提則血分之寒固應出就氣分而

解無從與泛治寒者竝論且凡入血之物偏能兼主  
疝瘕堅積在篇中可稽也惟本太陽病下之因爾腹  
滿時痛者桂枝加芍藥湯主之則芍藥應止滿痛今  
乃言痛不言滿霍亂寒多不用水者理中丸主之吐  
多者去朮今乃以嘔吐而用朮似與仲景相悖不知  
吐多云者原未嘗不利特較之吐爲少也凡兩面奔  
馳之證欲其止則俱止作則相稱如一面止一面加  
則證益危矣朮本止利今旣利少於吐而更止之是  
使爲全吐之敗證矣是以去之非爲有礙於吐也故  
下文曰下多者還用朮下多云者見吐雖多而下亦  
多勢不偏重也勢不偏重則無須去朮矣况嘔吐而

用朮者甚多奚啻如右然證之以五苓散茯苓澤瀉  
湯豬苓散則皆爲有水則今之治痛而嘔吐亦爲水  
非爲痛也本太陽病因下轉入太陰部位雖易卻未  
易邪自還當以太陽之治治之矣無如桂枝證所受  
之邪陽邪也桂枝證所據之地軀幹也以軀幹之邪  
而移入腹中爲陽邪陷於陰位陽邪據於陽自宜治  
以寒熱停勻之法旣已入陰陰將蔽之而不使出此  
腹所以滿陽又不甘爲蔽而與相支持此所以時痛  
故必以比於陰而不附陰不助陰者使之入陰以操  
同室之戈拔陷入之陽邪仍使從表出耳倘陰不欲  
蔽陽僅爲陽入陰中而與陰角則但痛而不滿矣勿

拘拘於滿而不痛不滿而痛此猶脹滿冷痛分為兩篇之旨也

腸鳴

丹蘘微寒

○主心腹邪氣腸鳴幽幽如走水

桔梗微寒

○腹滿腸鳴幽幽

海藻寒 ○腹中上下鳴

昆布寒

類證

半夏生微寒熱溫 ○胃脹欬逆腸鳴

傷寒汗出解之後胃中不和乾噫食臭脅下有水氣

腹中雷鳴下利者生薑瀉心湯主之傷寒中風醫反

下之其人下利日數十行穀不化腹中雷鳴心下痞

硬而滿乾嘔心煩不得安此非結熱但以胃中虛客  
氣上逆故也甘草瀉心湯主之嘔而腸鳴心下痞者  
半夏瀉心湯主之腹中寒氣雷鳴切痛胃脅逆滿嘔  
吐附子粳米湯主之可見水火不相激不爲腸鳴陰  
陽能相交腸鳴自己然此皆因他病中有腸鳴不得  
以腸鳴爲病本也惟此數味者所主之腸鳴乃爲病  
之本然亦同爲陰陽不交水火激射所異者竝無他  
病乃水爲氣束而難行氣爲痰格而難達淹蹇抑鬱  
莫名其狀而惟腸自鳴耳雖然還宜察其聲以求其  
故也幽幽者微而和上下者迴而轉欬逆者不欬逆  
則不鳴此其差等卽有陰不奉陽陽不化陰水不濟



本經序疏要卷之四目錄

心下滿急三十一

心煩三十二

積聚癥瘕三十三

鬼疰尸疰三十四

驚邪三十五

癩癘三十六

喉痹痛三十七

噎病三十八

知無難三十一

聖典三十八

難取三十五

難取三十六

難取難取三十三

康莊只此三十四

心平難意三十一

心難三十二

本經戶政要卷之四目錄

本經序疏要卷之四

武進鄒澍學

天心下滿急

茯苓平。心下結痛。

枳實寒微寒。心下急痞痛逆氣。

半夏平。生微寒熟溫。心下急痛堅痞。

朮溫。除心下急滿。

生薑微溫。和半夏主心下急痛。

百合平。除心下急滿痛。

橘皮溫。和杏仁蜜凡主心下結鞭。

藥對庵閭子微寒主心下堅。療心下堅膈中寒熱。

杏仁溫主心下急滿臣。消心下急

石膏大寒主心下急臣。心下熱氣驚喘

心下滿急卽胃痹之類歟不然何以篇中有橘枳生薑湯茯苓杏仁甘草湯也心下滿急卽水飲之所爲歟不然何以篇中有枳朮湯小半夏湯小半夏加茯苓湯也夫心下滿急之氣結不行固有類於胃痹其爲病之根固不出於水飲第言其處則曰心下言其狀則曰滿急能不推求其故混同胃痹水飲治之乎夫曰心下則其處狹於胃中曰滿急則其狀甚於脹痛蓋貯物充盛毫無空隙謂之滿急如弦張謂之急

通評虛實論王註

非特不波及於腹且不徧於胃以爲胃痹

則胃痹有緩有急此則但急不緩以爲支飲則支飲  
在傍此則在中所據之地甚微所憑之勢甚猛自是  
胃中之氣爲水飲所格急切不能升降金匱要畧曰  
病人胃中似喘不喘似嘔不嘔似噦不噦徹心中憤  
憤然無奈者生薑半夏湯主之彼則言其所欲不能  
之跡此則言其爲病之根若生薑半夏湯則正煌煌  
列於篇中者也更詳篇中之義此證係以陰困陽特  
其陽有盛有衰其最衰者宜化陰以伸之其次則導  
陰以舒之百合庵其最盛者雖困於中仍能劫陰以  
助陽卻宜通陽以救陰者石膏其等限不可紊也篇中  
僅臚藥十味與腹脹滿篇同者四與痰飲篇同者六

與上氣欬嗽篇同者四祇石膏一味無同焉以其病  
固與腹脹滿同狀而部位異與痰飲同體而動靜異  
與上氣欬嗽同源而趨向異耳

心煩

石膏微寒大寒。止消渴煩逆。

滑石寒大寒。除煩熱心躁。

杏仁溫。心下煩熱。

梔子寒大寒。心中煩悶。

茯苓平。心下結痛寒熱煩滿。

貝母平微寒。傷寒煩熱欬嗽上氣止煩熱渴。

通草平。療脾疸常欲眠心煩。

李根大寒。止心煩逆奔氣。

竹瀝大寒。暴中風風瘴胃中大熱止煩悶。

烏梅平。主下氣除熱煩滿。

雞子微寒。除心下伏熱煩滿欬逆。

豉寒。傷寒頭痛寒熱瘴氣惡毒煩躁滿悶。

甘草平。煩滿短氣。

知母寒。傷寒久瘧煩熱。

尿寒。療血悶熱狂。日華

蜀本 盧會寒。主熱風煩悶胃隔間熱氣。

天竺黃寒。

胡黃連平。大人五心煩熱。唐本

藥對 王不留行平主心煩君。止心煩鼻衄。

石龍芮平主心煩君。止煩滿。

玉屑平主胃中熱心煩君。除胃中熱喘息煩滿止。

寒渴

雞胫微寒除熱主煩熱君。除熱止煩。

寒水石大寒主煩熱臣。皮中如火燒煩滿。

藍汁寒主煩熱君。止心煩躁。藥性論

棟實寒主大熱狂使。傷寒大熱煩狂。

廩米溫止煩熱臣。主下氣除煩渴。

敗醬微寒主煩熱臣。除疹煩渴。藥性論

梅核仁平主煩熱臣。

疾藜子微寒主心煩君。止煩下氣

龍齒角平主小兒身熱臣

牛黃平主小兒癩熱口不開心煩君

酸棗平主心煩。煩心不得眠虛汗煩渴

煩之訓為勞

禮記樂記註

為劇

周官司隸注

為擾

廣正釋詁

為亂

考工

記弓人注為多

淮南俶真訓注

為眾

大戴記少間註

似與病之煩不相當

者而不知煩心病也凡心之為用由外入者自此而

藏於中由中出者自此而暴於外設有熱蕪累於其

間則中外攪擾於是平昔之所為與目之所見耳之

所聞未嘗思而忽來欲剖決而不得一事未已一事

復起憧憧往來歷碌難稽此可為眾多擾亂劇勞否

耶雖然是在方書溯其源則一出於熱揆其派則為

虛熱為實熱已耳及歷稽是篇所隸而後知熱之所

由化熱之所挾持熱之所停頓不一而足并有不必

由熱者觀之天可知夫天之所以使人煩者非溼熱

鬱蒸即蘊隆亢旱然不有山川崇卑彼此之相殊乎

不有夏秋春冬節序之早晚乎就其推移溯其遷化

已指不勝屈况即鬱蒸亢旱而論民之所以徒避望

救者且必審高下向背以求即於安此治煩之所以

熾盛者折石膏棟實寒水石藍汁衝逆者抑杏仁梔子竹瀝相

持者解貝母李根皮豉壅遏者通通草滑石茯苓疲罷者和甘草

稟米焦涸者滋知母雞子酸棗仁玉屑頑劣者化牛黃敗醬散漫者收

龍  
齒究致病之源隨所在卽所據而利而導之慰而安

之治煩之法於是乎擴充然謂已盡則未也

煩非重病也故太陽病欲自解者必當先煩乃有汗而解陽明不吐不下心煩者可與調胃承氣湯病已差尙微煩不了了者不過大便秘太陰中風四支煩疼爲欲愈少陰病雖煩下利必自愈惡寒而蹇時自煩欲去衣被者可治厥陰病厥而嘔芻脅煩滿者其後僅便血寸口脈陰陽俱緊證至其人大煩目重臉內際黃爲欲解皆以煩乃從陰出陽之候也惟其兼躁則爲自陽入陰乃是重病故太陽病躁煩者爲欲傳傷寒六七日躁煩者爲陽去入陰而少陰病吐利

躁煩四逆者死自利煩躁不得臥者死亦良以煩屬

於心躁屬於腎耳攷躁之訓為動淮南主術注為疾廣疋釋詁

為狡淮南原道注為不安靜論語季氏集解引鄭注為暴急荀子富國注

為好變動周書諡法是煩為心動躁為體動心動猶是陽

不容陰體動則是陰不容陽故且煩且躁者雖係死

徵猶有可救若僅躁不煩則陽亦無以自容故陽微

發汗則躁不得眠少陰病不煩而躁者死傷寒發熱

下利厥逆躁不得臥者死脈微而厥膚冷躁無暫安

時者為藏厥則皆必死之證矣雖然煩亦不盡由心

然必病應於心乃煩躁固不由於體然必病應於體

乃躁故溼家有身體煩疼關節煩疼脾病有腹中煩

重穀疸飽則發煩頭眩黃疸有四支苦煩婦人雜病  
有腹滿手掌煩熱而躁之義更有如物既燥乃動而

飛揚者

名釋

則係陽不浹陰陰不入陽陽燥而欲飛動

陰非特不能使之攝納且將逆而逐之矣雖然欲知

煩之所以然斷須擴充斯義若註此篇之煩則毋庸  
論計及此何者篇目固曰心煩也形容心煩之狀莫  
妙如反覆顛倒心中懊懣者此篇梔子豉湯咸具焉  
故曰煩非重病也然亦非實病如心中悸而煩心中  
煩不得臥下利咽痛胃滿心煩下利欬而嘔渴心煩  
不得眠可知矣而其主治煩取裁於是篇則此篇之  
不可列極寒極溫極補極洩正爲此矣似與仲景書

各途而實一貫之大指也

不積聚癥瘕

空青寒大寒○破堅積

朴消寒大寒○逐六府積聚固結畱癖破畱血閉絕停

痰痞滿芒消大寒○主五藏積聚久熱胃閉破畱血

腹中痰實結搏

石硫黃溫大熱○療心腹積聚冷癖在脅

粉錫寒○去鼈瘕

大黃寒大寒○破癥瘕積聚畱飲宿食

狼毒平○破積聚飲食寒熱水氣脅下積癖

巴豆溫生溫熟寒○破癥瘕結聚堅積畱飲痰癖

附子溫大熱。○破癥堅積聚血瘕。

烏頭溫大熱。○破寒熱積聚。

苦參寒。○主心腹結氣癥瘕。

芫胡平微寒。○去腸胃中結氣飲食積聚諸痰熱結實。

鼈甲平。○主心腹癥瘕堅積寒熱溫瘧血瘕。

蜈蚣溫。○療心腹寒熱結聚。

赭魁平。○主心腹積聚。

白馬溺微寒。○破癥堅積聚男子伏梁積疝婦人瘕疾。

鮫甲微溫。○主心腹癥瘕伏堅積聚寒熱。

礞石大熱生溫熟熱。一本作礞石。

掌氏曰礞石條竝無主療積聚癥瘕之文

一本作礞石者為非

芫花溫微溫

掌氏曰唐蜀本作蕘花今據本經蕘花破積聚癥瘕而芫花非的主當作蕘花

鱠魚微溫

掌氏曰唐本蜀本云鮪魚甲微溫無此鱠魚一味遍尋本艸竝無鱠魚上已有鮪甲此鱠

魚為文誤不當重出

蜀續隨子溫。主婦人血結月閉癥瘕疰癖瘀血除痰

飲積聚下惡滯物

京三稜平。主老癖癥瘕結塊

太陰玄精溫。心腹積聚冷氣

威靈仙溫。久積癥瘕疰癖氣塊

牡蒙平。主心腹積聚寒熱邪氣

藥對

蜀漆平主癥結癖氣使。腹中癥堅痞結積聚

貫衆微寒主腸中邪氣積聚使。破癥堅

甘遂寒主破癥結積聚使。破癥堅積聚利水穀道。  
天雄大熱主破癥結積聚使。破積聚邪氣心腹結  
積。

理石寒主除熱結破積聚。破結聚。

消石寒主破積聚堅結君。去蓄結飲食推陳致新。

證類猪肚微溫

五十五難曰積者陰氣聚者陽氣故陰沉而伏陽浮  
而動氣之所積名曰積氣之所聚名曰聚積者五藏  
所生聚者六府所成積者其始發有常處其痛不離  
其部上下有所終始左右有所窮處聚者其始發無  
根本上下無所畱止其痛無常處巢元方曰癥者由

寒溫失節致府藏之氣虛弱而食飲不消聚結在內

漸染生長塊段盤牢不移動者是也瘕者由寒溫不

適飲食不消與藏氣相搏積在腹內結塊瘕痛隨氣

移動虛假不牢者是也觀此則積聚由氣瘕瘕由物

積定而聚移瘕牢而瘕散截然四項不可混矣乃今

不特篇題合而為一前列之藥竟有一物而四項竝

主之者大黃巴豆附子白馬有竝主三項者蜀漆貫

主積聚瘕驚甲威有竝主二項者朴消芒消石硫黃

靈仙主積聚瘕有竝主一項者狼毒烏頭苾胡赭

魁元精石牡蒙理石消石主其僅主一項者空青主

積聚苦參京三棱主瘕瘕不竟與難經病源不相

主聚粉又不四證皆有瘕無

錫主瘕者不竟與難經病源不相

應歟雖然氣能阻物物亦能阻氣則因積聚可以生

癥瘕因癥瘕可以致積聚矣聚者氣有聚散瘕者物可動移故積可兼癥瘕聚不可兼癥瘕積聚可兼癥不可兼瘕是其篇目正合以類相從其論治正合緣異生別謂之爲混適當因混而得析謂爲不相應正賴此乃得互相印證其果混耶其果不相應耶是已

可無措意所宜措意者部分也物類也細覈篇中部

分之目有三曰心腹蜈蚣石硫黃赭魁曰脅下狼毒曰

腸胃此胡物類之目有五曰痰朴消巴豆曰水狼毒曰

飲狼毒消石大黃續隨子曰食狼毒消石大黃甘遂曰血朴消芒消驚甲

皆以詔後人因病何在而求藥之所抵因物何屬而

取藥之所當爲反三之舉一焉故就是中而言則任

六淫皆可致積聚而茈胡烏頭可以治風附子天雄石硫黃可以治寒苦參貫衆理石可以治暑治火諸消空青大黃可以治燥威靈仙甘遂狼毒可以治溼出乎外而言則任隨物皆能成癥瘕而狗屎可治魚肉癥敗篋敗梳可治蝨癥鷄屎白可治米癥油可治髮癥莫不圓陀陀活潑潑更出其外而究之且無不可矣

積聚癥瘕以互相援引而成則互相牽制爲治其用也有體焉益當知之則其所以然自可識也夫曰氣爲積聚物爲癥瘕然不有氣而竟成癥瘕物而僅成積聚者乎物而僅成積聚則金匱要畧所謂宿食者

明係食物結而不行惟憑吐下不謂癥瘕是也氣而  
竟成癥瘕則諸病源候論所謂積聚痼結者明係氣  
聚復因邪氣重沓牢痼久卽成癥是也若是則積聚  
癥瘕益似混而難定而孰知如此乃益可定耶請以  
四言決之曰形而上者爲積聚形而下者爲癥瘕積  
聚者以物之死氣阻人生氣癥瘕者已自鍾生氣而  
用人生氣爲使盡之矣何謂形而上者爲積聚仲景  
曰脈緊如轉索無常者宿食也又曰脈緊頭痛風寒  
腹中有宿食不化也見風寒之脈風寒之證而竝無  
風寒止係宿食爲患故雖實有物而僅得爲積聚不  
謂爲癥瘕以其見證形於上形於外所以知其因氣

爲害也何謂形而下者爲癥瘕仲景曰妊娠六月動者前三月經水利時胎也下血者後斷三月衃也所以血不止者其癥不去故也又曰陽明病中寒不能食小便不利手足濇然汗出欲作固瘕必大便初鞭後澹以胃中冷水穀不別故也證屬傷寒甯汗出而不得小便已結胎元甯漏下而不以養胎故雖實無物而竟目爲癥瘕不謂爲積聚以其見證形於下形於內所以知其因物爲害也何謂以物之死氣阻人生氣則如以上宿食諸證是也何謂其物自鍾生氣用人生氣爲使則如千金外臺諸書所論髮癥嗜油食癥嗜食魚肉癥嗜魚肉米癥嗜米此非人所欲食

乃物使然也

然則癖也疝也獨非有形堪與積聚癥瘕匹者乎篇中所列藥物明載治是兩病者且四之一特同類得以相該而於目不繁贅耳欲釋此者猶可不別其同中之異耶巢氏曰三焦否膈則腸胃不宣因飲水漿過多便令停滯不散更遇寒氣積聚成癖癖謂僻側在兩脅之間有時而痛苦經久不差結聚成形段而起按之水鳴則爲久癖若兩脅之側轉動便痛不耐風寒不欲食而短氣又爲水癖由是觀之積聚癥瘕有在偏旁者然不終在偏旁癖則無在中者積聚癥瘕有因水漿者然不皆因水漿癖則無不因水漿者

以此爲別庶可知其異矣至於疰諸書皆不言其狀

惟外臺秘要凡治疰方悉云兩肋相引弦急脹滿則

是癖之屬而兼脹滿弦急者蓋癖惟由飲疰則兼氣

故本篇藥物主治於癖則曰冷曰飲曰痰曰畱惟兼

疰則曰瘀血

續隨子

曰氣塊

威靈仙

是其所以分猶不可

意會得耶且外臺主治方目有酒癖有痰癖有飲癖

有癖飲有療癖有癖結有寒癖有久癖有癖羸瘠有

疰癖有疰氣有疰癖不能食有癥癖有癖硬如石腹

滿有癥癖疰氣灸法癖不稱氣而疰則稱氣亦可證

前言之不謬也條而鬯之按而則之治癖治疰思過

半矣

鬼疰尸疰

雄黃平寒大溫。主鬼疰殺精物惡鬼

丹沙微寒。殺精魅邪惡鬼

金牙平。主鬼疰毒蠱諸疰

野葛溫。殺鬼疰

馬目毒公溫微溫。主鬼疰精物辟惡不祥

女青平。逐邪惡氣殺鬼溫瘧辟不祥

徐長卿溫。主鬼物百精

虎骨平。除邪惡氣殺鬼疰毒

狸骨溫。主風疰尸疰鬼疰毒氣在皮膚中淫躍如針

刺心腹痛走無常處

鶴骨。主鬼蠱諸毒五尸心腹疾

獺肝平。主鬼疰蠱毒

芫青微溫。主風疰鬼疰

白殭蠶平

鬼白溫

微溫掌氏曰神農本草鬼白一名馬目毒公今此療鬼疰尸疰藥雙出二名據本艸說為

重當刪去一條然詳陶隱居注鬼白條下以鬼白與馬目毒公為一物及古方多有兩用處今且竝存之

白鹽寒

掌氏曰本經言鹽有食鹽光明鹽綠鹽鹵鹽大鹽戎鹽六條竝無白鹽之名遍檢諸鹽皆不主

鬼疰尸疰惟食鹽主殺鬼蠱邪疰又陶隱居注戎鹽條下述虜中鹽有九種云白鹽食鹽常食者則白鹽

乃食鹽之類而食鹽主殺鬼蠱邪疰疑此白鹽乃食鹽耳即當為溫又不當為寒也

蜀本 天靈蓋平

膈膈大熱。主鬼氣尸疰夢與鬼交鬼魅心腹

對藥

麝香溫君。殺鬼精物療凶邪鬼氣。

卷柏溫臣。治尸疰鬼疰腹痛去百邪鬼魅。

藥性論

敗天公平君。主鬼疰精魅。

證類

蚱蟬寒

白鮮皮寒

牛黃平。除邪逐鬼。

龍齒平微寒。殺精物骨主心腹鬼疰精物老魅。

雷夔寒大寒

安息香平。主心腹惡氣鬼疰。

代赭寒。主鬼疰殺精物惡鬼腹中毒邪氣。

世無識鬼疰尸疰者以余揣之其病頗有皆緣醫不

加察漫認爲勞投以寒涼滋補無不斃者遂更傳其親串病復如是甚至闔門竝逝殊可悲憫也巢氏曰疰之言住也謂邪氣居住人身由陰陽失守經絡空虛風寒暑溼勞倦所致言其連滯停住也夫尸者人之體鬼者人之精靈人之與人本係同類而相親是以中尸氣者令人寒熱淋瀝沉沉默默不的知所苦而無處不惡或腹痛脹滿喘急不得氣息上沖心胷旁攻兩脅或螺塊踊起或攣引腰脊或舉身沉重精神錯雜昏謬是病於人軀體爲多中鬼氣者令人心腹刺痛或悶絕倒地得差之後餘氣不歇積久停住發動有時是病於人府藏者爲多其不傳染他人

而專貽親串則以晝夜陪伺調護憂傷之餘患氣薰  
灼之久故耳觀篇中用意皆假變幻靈通之質威厲  
猛烈之性芳香走竄之氣沉雄惡毒之味按其爲中  
軀體爲中藏府循隙析理而投之以震驚其居住之  
堅牢鈐制其止發之自由靜則誘引而搜剔之動則  
乘勢以驅逐之不涉於補不流於瀉其境與虛勞迥  
異知其異而按其則以爲治焉非特愈一人疾厄已  
也

雖然此爲疰病不傳變者言耳逮其傳變則不得以  
此律之矣詳哉蘇游之論也其言曰疰病初得半臥  
半起號爲殫殍氣急欬者名曰肺痿骨髓中熱稱爲

骨蒸內傳五藏名之伏連假如男子因虛損得之名  
爲勞極吳楚云淋瀝巴蜀云極勞死訖復易家親一  
人故曰傳尸亦名轉症是殮殍肺痿骨蒸伏連淋瀝  
各有其治而無與於篇中諸藥物矣特既可名勞極  
則是去勞極爲近究何以析之夫勞之爲病金匱要  
畧虛勞篇論之詳矣症病仍當以蘇游之論爲別曰  
傳尸之候心胷滿悶背髀煩疼兩目精明四肢無力  
雖知欲臥睡常不著脊膂急痛膝脛痠寒多臥少起  
狀如佯病每至旦起卽精神尙好欲似無病從日午  
以後卽四體微熱面好顏色喜見人過常懷忿怒纔  
不稱意卽欲嗔恚行立腳弱夜臥盜汗夢與鬼交通

或見先亡或多驚悸有時氣急有時欬雖思想飲食而不能多食死在須臾而精神尙好或兩脅虛脹或時微利鼻乾口燥常多粘唾有時唇赤有時欲睡漸就沉羸猶如水涸不覺其死此其與虛勞大異者也至其分析傳變五藏之形曰其源先從腎起初受之氣兩脛痠疼腰脊拘急行立腳弱食飲減少兩耳颼颼似風聲夜臥夢洩陰汗痿弱腎既受已次傳於心心初受氣夜臥心驚或多忪悸心懸乏氣吸吸欲盡夢見先亡有時盜汗食無滋味口內生瘡心常煩熱惟欲眠臥朝輕夕重兩頰唇口悉紅赤如傳烟脂又時手足五心皆熱心既受已次傳於肺肺初受氣

時時咳嗽氣力微弱有時喘氣臥卽更甚鼻口乾燥  
不聞香臭假令得聞惟覺朽腐物氣有時惡心憤憤  
欲吐肌膚枯燥或時刺痛或似蟲行乾皮細起狀若  
麩片肺旣受已次傳於肝肝初受氣兩目膜膜面無  
血色常欲顰眉視不及遠日常乾澀又時赤痛或復  
睛黃朝暮膏盞常欲合眼及至於臥睡還不著肝旣  
受已次傳於脾脾初受氣兩肋虛脹食不消化又時  
渴利熟食生出有時肚痛腹脹雷鳴脣口焦乾或生  
瘡腫毛髮乾聳無有光潤或復上氣擡肩喘息利赤  
黑汁至此候者將死之證也能悉乎此斯不與虛勞  
混彼此悞治矣

千金之隸是於肺病項下也將無以其氣從鼻吸入  
耶抑以其能變肺痿骨蒸耶然皆小焉者也其大處  
則以是病乃壞人之精魄致魂無所依氣無所主血  
無所朝而死魄非肺之所藏耶魄者金水之精譬之  
於鏡能映物而不能燭物遇寒則清逢熱則昏故千  
金之論曰凡諸心腹痛服衆方熱藥入腹寂然不動  
但益氣息急者此尸疰病也試觀前蘇游所列病狀  
有一堪用熱藥者乎篇中所列諸藥物有一大溫大  
熱者乎曰尸疰初覺先與甘草汁一升消息少時服  
瞿麥湯盡一劑得下便覺稍寬亦可知其從鼻吸入  
卽布於胃而化熱遂盤旋於血分水道水道者肺氣

所由通調血分者肺家爲所朝會入其所主之竅窒其數布之節而剗削其所容之神消耗其所治之氣始終與肺爲患謂爲肺病不亦宜哉然篇中所列藥物謂爲治肺不可也其理何在夫病在何藏卽從何藏治是金元已來所長苟其當理則不必更勤求古訓矣是固宜別其所感何氣觀其所化何似揣其所嚮何方決其所成何患則篇中藥物味味靈通絲絲順理不治肺而肺家所入之邪卻肺藏治節之職復旣不使邪惡之氣化熱而附水道侵精魄詎非的當之至歟倘但知邪氣何屬而不知邪氣之化邪氣所在而不知邪氣之傳均可謂執中無權舉一廢百此

有明後葉之弊貽害於今者也

驚邪

雄黃平寒大溫

丹沙微寒

紫石英溫 ○ 補心氣不足定驚悸安魂魄填下焦

茯神平 ○ 止驚悸多恚怒善忘

龍齒平 ○ 驚癇癲疾狂走心下結氣不能喘息

龍膽寒大寒 ○ 主驚癇邪氣

防葵寒 ○ 癲癇驚邪狂走

馬目毒公溫微溫

升麻平微寒 ○ 小兒風驚癇

藥性論

麝香溫 ○ 小兒驚癇客忤鎮心安神合丹沙水灌下

人蔘微寒微溫 ○ 安精神定魂魄止驚悸

沙參微寒寒 ○ 除血積驚氣

桔梗微溫 ○ 驚恐悸氣

白薇平大寒療驚邪風狂症病居隱

遠志溫 ○ 定心氣止驚悸

柏實平 ○ 主驚悸安五藏益氣

鬼箭寒

鬼督郵平

小草溫

卷柏溫平微寒 ○ 鎮心治邪啼泣

紫菀溫 ○小兒驚癇

羚羊角寒微寒 ○除邪氣驚夢狂越僻謬

鮫甲微溫 ○五邪涕泣時驚

丹雄雞微溫微寒

犀角寒微寒 ○止驚安五藏 日華

殺羊角溫微寒 ○止驚悸

茯苓平 ○憂恚驚邪恐悸心下結痛

蚱蟬寒 ○小兒驚癇夜啼

蜀縮沙蜜溫

證類 鬼臼 掌氏說見鬼 庄尸疰篤

搐搦牽掣抽縱也古人名之曰瘵癢其病在筋脈振

顫震動戰慄也古人名之曰振其病在肌肉皆由於外而無與於神志驚則病在神志而發自中時若有所見聞有所恐怖其形體手足掣而不縱動而不慄所以然者心以陽舍陰以靜攝動驟有恐迫陽縮入陰動混於靜不能自振則肝起爲禦侮於是陽錯行而氣遂亂舉痛論曰驚則心無所倚神無所歸慮無所定故氣亂奇病論曰有所大驚氣上不下精氣并居金匱真言論曰肝病發驚駭大奇論曰肝脈驚暴有所驚駭又曰腎肝并小弦欲驚竝與是義帖切故篇中所列諸品皆取乎奠安陽中之陰扶翼動中之靜此猶朝廷綱紀紊亂則方面竝起名曰勤王實以

觀釁但得內庭整肅則方面自然退聽是以第交媾陰陽調燮水火而不顛顛於治心治肝誠可謂以無厚入有間也矣然不曰驚而曰驚邪則以驚有因邪而致者與因驚而生邪者異也因邪而致驚奈何金匱要畧曰病有奔豚有吐膿有驚怖有火邪此四部病皆從驚發得之不但言驚而繼以發見病雖固有然不應致此所以致此則因乎驚也傷寒論曰太陽傷寒加溫針必驚少陽不可吐下吐下則悸而驚是因邪致驚之由此胡加龍骨牡蠣湯桂枝去芍藥加蜀漆牡蠣龍骨救逆湯桂枝加桂湯茯苓桂枝甘草大棗湯奔豚湯是因邪致驚之治其因驚而致邪則

下篇所列癩癩是矣癩癩既別為篇奈何茲篇重列

治之之物亦以癩癩雖因驚而致然亦有因邪而驚

因驚復癩癩者故篇中凡節本經別錄諸物主治涉

及癩癩者竝與癩癩篇復龍齒防葵升麻見驚邪癩

癩雖分門別戶然驚邪不解仍得為癩癩癩之內

仍有因驚邪者疏其派正以各會其全非復也亦非

混也至篇中驚邪治法與傷寒論金匱要畧迥不相

謀則以前所論諸湯皆治傷寒者也夫邪亦何常之

有有正邪有虛邪有賊邪有雜邪風有八痺有五豈

得槩而言者所論諸湯僅一奔豚湯自係雜邪餘者

竝屬正邪變幻不有此篇拾遺補闕焉得治驚邪全

體哉

本篇諸藥物主治除驚癇癲疾外多曰驚悸曰驚狂蓋又有陰迫陽陽迫陰之別焉夫水停爲悸火盛爲狂驚悸驚狂究其來歷雖絕不由水停火盛徵其見在則有非水停火盛不爲驚悸驚狂者其故可約畧而言也曰傷寒八九日下之胃滿煩驚小便不利讖語一身盡重不可轉側者柴胡加龍骨牡蠣湯主之非水停耶曰傷寒衄浮醫以火迫劫之亡陽必驚狂起臥不安者桂枝去芍藥加蜀漆龍骨牡蠣救逆湯主之非火盛耶然以火盛而曰陽亡以水停而用大黃緣誤治耳設不因誤治而陽迫陰陰迫陽則水停

者當思濬其道火盛者當思熄其燄卽指誤治者言

水停仍須茯苓火盛猶賴蜀漆其旨不可窺見哉况

本是虛邪雜邪暨夫不因邪者故篇中藥物下所繫

主治凡言驚悸者無性寒之品言驚狂者無性熱之

品就是而推不旣思過半歟觀其安陰於陽中雄黃丹沙

人漫紫石英清火於水中龍膽攝火以歸土龍齒導水以

就窪茯苓神撥陰之遏陽升麻舉陽使出陰蚱蟬挽陽以入

陰遠志闢陽以通陰犀角於陰中伸陽丹雄雞就陽中益陰

沙鑿陰之閉陽麝香開陽之拒陰桔梗帖陰陽之違從施

擒縱俾就理會謂治驚尙有遺義哉

癩癩

龍齒角平。齒主大人小兒驚癇癩疾狂走角主驚癇

癰癰身熱如火

牛黃平。小兒諸癰熱口不開大人狂癲

防葵寒。欬逆溫瘧癲癩驚邪狂走

白斂平微寒。小兒驚癰溫瘧

牡丹寒微寒。驚癰邪氣

葇荊子寒。療癲狂風癰顛倒拘攣

雷凡寒微寒。主癲癰狂走

鈎籐微寒。主小兒寒熱十二驚癍

白殭蠶平。小兒驚癍夜啼

蛇牀子平。癲癍惡瘡溫中下氣

蛇脫平。主小兒百二十種驚癇瘵瘵癲疾寒熱

蜣蜋寒。主小兒驚癇瘵瘵腹脹寒熱大人癲疾狂易

白馬目平。主驚癇腹滿瘧疾

鉛丹微寒。主驚癇瘵瘵除熱下氣

蚱蟬寒。主小兒驚癇夜啼癲病寒熱

白狗血溫。主癲疾發作

豚卵溫。主驚癇瘵瘵

猪牛犬等齒平

熊膽寒

<sup>蜀</sup>盧會寒。主熱風煩悶胃膈間熱氣小兒癲癇驚

瑋瑁寒。止驚癇

日華

藥對

白馬懸蹄平臣。主驚邪癩瘕。

淡竹瀝大寒臣。

蛇銜微寒主寒熱臣。主驚癩寒熱邪氣除熱。

秦白皮微寒大寒。小兒癩身熱。

頭髮溫。小兒驚癩。

雞子平主發熱。主熱火瘡驚癩。

狗糞中骨平臣。主寒熱小兒驚癩。

露蜂房平使。驚癩瘕瘕寒熱邪氣癩疾。

白鮮皮寒臣。小兒驚癩。

雀甕平使。主小兒驚癩寒熱結氣。

甘遂寒使。

升麻微寒君。小兒風驚癩藥性論

大黃大寒使

證類

銀屑。與銀薄同主定志去驚癩小兒癩疾狂走

巢氏曰癩者小兒病也十歲已上為癩十歲已下為癩予以為不盡然奇病論曰人有生而病癩者得之在母腹時母有所大驚氣上而不下精氣并居故令子發為癩疾也小兒有癩則大人不可有癩乎案備列癩病形象莫詳於甲乙經其目但標癩者不兼癩癩癩狂竝舉則每兼之而癩則口眼相引目睛上揺手足掣縱之謂是癩不必掣縱癩必掣縱癩而狂亦掣縱癩而癩或不掣縱非癩癩之確別歟奈世人見

此二證而均不識也。凡卒仆無知痰涎湧出者無論掣縱與否皆謂之癇而以神識不慧語言錯亂者爲癲。不知甲乙經所載除因外邪寒熱此外如僵仆嘔沫目妄見口喎喎悸耳鳴頰腫吐舌吐血羊鳴戾頸短氣胷背痛痿厥洞泄煩滿悲泣轉筋目眈眈衄衄皆癲之兼證。病源所載癇證如搖頭弄舌睡中驚掣數齧齒屈指如數背脊強直頸項反折等與癲絕不相同。癇之與癲豈果難分耶。雖然玩篇中所摘本經別錄主治則混稱固不可過析亦不可要須深明其故也。觀治癇者每比於驚可知其氣之亂而伏行經隧矣。治癲者每比於狂可知其氣之并而鬱勃難達。

矣而難經曰

二十

重陽者狂重陰者癲是當析者也

靈樞曰

邪氣藏府  
病形篇

心脈緩甚為狂笑微瀆為癲疾其

不析何也素問脈解篇太陽所謂甚則狂癲疾者陽

盡在上而陰氣從下下虛上實故狂癲蓋均是相并

陰盛於下則癲陽盛於上則狂陰陽互并而相搏則

癲狂此甲乙經多癲狂竝提之證本篇多狂癲竝治

之藥也而驚與癩之析者有二陰急為癩厥二陽急

為驚之文其混者有心脈滿大癩癆筋攣肝脈小急

癩癆筋攣腎肝并小弦欲驚之文

竝素問  
大奇論

病源曰氣

血不和熱實在內心神不定所以發驚甚者掣縮攣

癩蓋心主血脈熱氣輳於本則驚輳於標則癩此驚

癩本相連屬古書所以多連稱而本篇亦多驚癩竝

治之藥也試不析癩癩而但舉其所兼之疾則有身

熱龍角鉛丹有溫瘡防葵白斂有寒熱鉤籐蛇脫蛻蟬白

蜂房雀甕秦皮牛黃有風邪牡丹蘆有惡瘡蛇牀子有脹滿蛻

狗糞中骨白馬目有拘攣荑若凡得全篇十之五若析癩癩無

論所兼所因者龍角牡丹白斂鉤籐白殭蠶白馬目

狗糞中骨雞子白鮮皮雀鈴丹瑋瑁白馬懸蹄蛇銜秦皮頭髮

可治癩狂復可治驚癩者準是而論析之亦何益矣

即以下為癩之證則篇中特提小兒而癩癩皆治者且

以下為癩之證則篇中特提小兒而癩癩皆治者且

三之一此又何說焉總之比其兼證別其寒溫而揣

其上下以定取捨是用此篇治癩癩之大綱亦分癩

癩之微旨矣

驚癩癩狂既每相連爲患本篇固爲癩癩正治驚則  
前有驚邪篇亦既詳論治矣至於狂則舍與癩相連  
者外遂可無治法乎夫狂有四端有陽鬱有七情有  
火邪有瘀血陽鬱者病能論曰陽氣者因暴折而難  
決故爲怒狂則所謂多與癩連者也七情者癩狂篇  
曰狂始生先自悲也喜忘苦怒善恐者得之憂飢狂  
言驚善笑好歌樂妄行不休者得之大恐狂者多食  
善見鬼神善笑而不發於外者得之大喜狂目妄見  
耳妄聞善呼者少氣所生此皆宜循其端以導之或

鍼治或如陰陽應象大論所謂悲勝怒恐勝喜怒勝  
思喜勝憂喜勝恐消息其意而調之可也火邪者傷  
寒論曰傷寒衄浮醫以火迫劫之亡陽必驚狂起臥  
不安者桂枝去芍藥加蜀漆龍骨牡蠣救逆湯主之  
是也瘀血者傷寒論曰太陽病不解熱結膀胱其人  
如狂血自下下者愈其外不解者尙未可攻當先解  
外外解已但少腹急結者乃可攻之宜桃核承氣湯  
太陽病六七日表證仍在衄微而沉反不結胸其人  
發狂者以熱在下焦少腹當硬滿小便自利者下血  
乃愈所以然者以太陽隨經瘀熱在裏故也抵當湯  
主之是也曾謂不與癩連者遂無治法乎然則神識

不慧語言錯亂世俗所謂癲者又何從治是在金匱  
可按也曰防已地黃湯治病如狂狀妄行獨語不休  
無寒熱其脈浮既無外感復無掣縱如狂非狂似癲  
非癲其治如此則與之類者可推測而知其槩矣  
孫真人千金方王太守外臺秘要於驚癇癲狂皆加  
以風字千金方又於風癲論中附載素問厥論全篇  
其義趣皆當深攷者也夫陰陽在人互相維繫乃生  
兩相背馳則死可卽而不可離然有乍相激而遂相  
離者有久相拒而仍相維者無他一則積漸使然一  
則卒然乘之耳夫癲癩與傷寒其陰陽之偏頗無異  
然而傷寒勝負不過十餘日而決裂癲癩相持有至

數年數十年不愈亦不死者此其故自有在矣譬之  
漢楚麇鬥五載而亡七國媾爭二百餘年未已且其  
間齊成田氏晉室三分他國終不能遂吞并之謀由  
其素與民浹不肯相離也是故癩由厥成風從厥化  
癩以驚作驚為風生風煽火熾火爍狂發驚癩癩狂

烏得不加風字而其所謂風在厥論固足寒則火上

逆而生風為狂足熱則風痰上湧而為癩而厥成為

癩疾

脈要精微論

精氣并居於上為癩

奇病論

陽盡在上陰

氣從下下虛上實為狂癩

脈解篇

陽盛則四支實能登

高棄衣而走且妄言罵詈不避親疏

陽明脈解篇

無不可

一以貫之是其以漸相并之勢積微成著之機或以

陰轉陽而陽愈盛如燈燭之燃脂或引陽就陰而陽愈牢如薪爇之蓄火豈猶冰炭之相迫水火之相沃

能不眨眼而漸盡哉故曰癩疾厥狂久逆之所生通評

虛實論 是其酷似七雄之爭非如鴻溝之鬥也使盡檢

千金外臺凡風狂風驚恐風邪五邪風驚悸風驚恐

風癩五癩風癩風眩風旋諸方合之本篇所列所未

及用者止十四味而在附錄者止八味蓋已得十之

七八矣苟以意消息之猶有不能用之物哉

癩者陽搏陰而難通狂者陽絕陰而無制皆陽窮化

風與驚癩之陽為風煽者異奈何藥物能竝主之也

夫合而言之則驚狂掣縱卒倒無知之際但見風陽

之擾亂遑定本末於由來竝治之物急所當需特苦  
僅得四味耳就四味而言如龍齒角攝水火於土而  
不使相逐牛黃除蓄熱於土而兼清內外蟻螂納穢  
濁於土而撲火之燄防葵出土最早而得水能沉均  
無論內傷外感皆可施用者又何陽化風風煽陽之  
別而有所隔礙耶分而言之則驚邪既有專條狂走  
又多別故如癎血大熱等病中皆可尋狂之治則是篇所重獨在癎癩  
故所列多直探病本不假旁推側擊而發表去邪者  
絕跡難求於此可悟靈樞癎狂篇有骨癎筋癎脈癎  
而無肉癎皮癎如有肉癎皮癎則外發之物在所必  
用矣通評虛實論曰癎疾脈搏大滑久自已陽中有

陰也。脈小堅急，死不治。陰之拒陽也，虛則可治，陰可

合陽陽可合陰也。實則死，陰陽不可相入也。篇中生而病癩

厥成爲癩，癩字內經皆作巛，故王注咸謂爲首疾。今從甲乙經千金方引用以皇甫士安孫真人皆在太

僕前也。

### 喉痺痛

升麻平微寒。○風腫諸毒喉痛口瘡。

射干平微溫。○喉痺咽痛不得消息。

杏仁溫。○雷鳴喉痺下氣。

蒺藜子溫微寒。○主喉痺。

棘針寒。掌氏曰本經白棘一名棘針，不主喉痺痛。棘刺花條末云又有棗針療喉痺不通。此棘針字當

作棗針。

絡石溫微寒。喉舌腫不通水漿不下

百合平除喉痹

篁竹葉大寒。除喉痹

莽草溫。療喉痹不通

苦竹葉大寒

唐本細辛溫。開胃中除喉痹

藥對豉寒治喉開不通使。主喉痹卒不語煎一升服覆

取汗

當歸溫切醋熬傅腫上亦主喉閉不通君

曹青岩曰喉嚨主天氣咽隘主地氣蓋咽主納穀喉

主出氣天氣者肺氣地氣者胃氣也天氣為邪所阻

則心主三焦之施化不行故濁結於上而爲痺病源  
曰喉痺喉裏腫塞痺痛水漿不得入令人壯熱惡寒  
七八日不治則死邪客於喉則人陰陽之氣不能出  
於肺循喉而上下是也地氣爲邪所阻則脾胃之轉  
輸不利故濁蒸於上而爲腫靈樞癰疽論猛疽發於  
噤中不治化爲膿塞噤中半日死膿得瀉者飲以豕  
膏三日已是也然痺則無膿有朝發夕死者腫則有  
膿有數日不死者蓋喉爲氣道氣道阻則津液留而  
不化結爲痰涎阻塞竅隧噤爲食道食道阻則胃氣  
餒而化熱蒸爲膿血阻遏氣機故瀉膿易而撤痰難  
也痺腫皆邪氣所爲有上受而結者下傳而結者故

凡內腫及外外腫涉內內腫外不腫外腫內不腫或曰喉閉或曰喉風是皆痺之類更有上熱下寒腫白而赤汗出喘逆爲陽之內竭喘渴吐血閉不能飲煩擾壯熱爲陰之內竭是皆不治又如噎上下左右或奇或偶結腫爲膿曰癰不爲膿曰蛾爲腐曰疔是皆噎腫之類實則熱痛俱盛而神清虛則熱痛俱微而神倦竭則如痺而死矣更婦人女子有所結於內亦發於喉或腫或腐遇勞怒卽發不甚爲楚男子間亦有之室孀發者特甚是卽少陰咽痛也少陰主唾熱則唾不上供利少陰之氣卽致少陰之唾非勞極之唾爲熱涸而音啞喉蝕比也

本經月經要 卷四  
據此則喉痹重在閉隘腫重在痛矣然厥論曰手陽  
明少陽厥逆喉痹噎腫欬論曰心欬則喉中介介如  
梗甚則咽腫喉痹則腫之甚者亦痹痹之甚者亦腫  
腫而至痹痹而至腫皆絕證也故推原治法定恃痛  
與閉孰甚所以篇中標痛者二其散發皆於陽分標  
不通者四其斡旋皆在陰中而均係開解其餘則盡  
下氣之物矣是治咽喉大旨不外降散兩端更別以  
寒熱之殊宜較以輕重之得所猶有遁而之不可爲  
哉

噎病

鈴羊角寒微寒。除食噎不通

通草平

青竹筴微寒

頭垢微寒。治噎酸漿水煎膏用之。

藥性論

蘆根寒。能解大熱開胃治噎。

藥性論

牛齡平。

按拾遺云牛口中齡草絞取汁服止噦不云治噎日華云牛涎止反胃嘔吐治噎要取則

以水洗口後鹽塗之涎自出

春杵頭細糠平。主卒噎。

藥對 鷓鴣頭微寒主噎不通。頭主噎及鯁燒末服。

說文曰噎飯窒也詩正義曰噎者咽喉蔽塞之名此

言噎之狀病源曰噎由憂恚所致憂恚則氣結氣結

則不宣流使噎噎者噎塞不通也又曰陰陽不和則

三焦隔絕三焦隔絕則津液不利故令氣塞不調理

也此言噎之由蓋憂為肺志腎家之水賴肺以輸脾

家之精賴肺以布因憂氣結不能循職則津液結滯

氣道不澤食入遂窒塞焉篇中之治或因其津液內

窒而通之於外竹筴蘆根或因其氣機外窒而通之於內

羚羊角外革拘曲而內之木直遂或因其不降而通之於下通草或因

其不升而通之於顛頭垢或直達其阻塞杆或曲肖其

食物牛涎鵝頭不泥執其由來但歆動其生氣古人治

病往往如此擴而充之則貝母之解鬱萱艸之忘憂

均可為三隅之反也若因其氣與食窒而用香燥開

通苦寒剋降則不勝其劣而病遂由此增劇矣雖然

千金方述古今錄驗云五噎氣噎憂噎勞噎食噎思噎也氣噎者心悸上下不通噎噦不徹胃脅苦痛憂噎者天陰苦厥逆心下悸動手足逆冷勞噎者苦氣膈脅下支滿胷中填塞令手足逆冷不能自溫食噎者食無多少惟胷中苦塞常痛不得喘息思噎者心悸動喜忘目視眈眈凡若是者猶可但以篇中諸藥治之歟夫特據其始自理歸一致暨推其變則分遂殊異津液結而不流能使陽氣痹而不宣亦能使陰氣凝而不釋陽痹不宣則蒸而生熱陰凝不釋則滯而爲寒寒熱相搏則激而成實寒熱相凌則削而成虛故仲景曰寸口脈浮大醫反下爲大逆浮則無血

大則爲寒寒氣相搏則爲腸鳴醫乃不知令飲冷水  
汗遂大出水得寒氣冷必相搏其人卽噎曰跗陽脈  
浮浮則爲虛浮虛相搏故令氣噎言胃氣虛竭也曰  
小青龍湯證若噎者小青龍湯去麻黃加附子主之  
斯足以窺其際矣更覈之以千金五噎凡乾薑湯之  
溫竹皮湯羚羊角湯之寒猶不可識其流耶特走竄  
攻下千金外臺終不及用此則當極加意耳  
有膈證者每緣噎所致靈樞僅列其名素問推言其  
由外臺雖列其治卻甚不可明本篇及千金并不載  
其目膈者病之末傳大證也死證也可不條理其緒  
俾人識其端或者十中可全二三乎夫膈淺言之則

靈樞一語盡其概曰氣爲上膈是也分言之則有上傳下傳焉素問陰陽別論曰一陽發病少氣善欬善泄其傳爲心掣其傳爲膈此上傳也一陽爲膽與三焦宜直達而不宜抑遏抑遏則氣機窒塞而難通難通則運用於中者寡上下間出者多於是心不舒爲掣食難入爲膈此卽由噎致者也曰三陽結謂之膈此下傳也三陽爲小腸膀胱有經過而無滯畱則逆逆則滿於中而反上出此由反胃致者也自金元已降噎膈反胃雖皆混稱然亦頗有見到語曰噎在上腕膈在中腕反胃在下腕是也但未檢病源所謂膈中氣結煩悶津液不通飲食不下羸瘦不爲氣力

爲憂膈心下苦實滿噫輒酢心食不消心下積結牢  
在胃中大小便不利爲悲膈胃脅逆滿噎塞胃膈不  
通噫聞食臭爲氣膈心腹脹滿欬逆腹上苦冷雷鳴  
繞臍痛食不消不能食肥爲寒膈藏有熱氣五心中  
熱口爛生瘡骨煩四支重唇口乾燥身體頭面手足  
或熱腰背疼痛胃痹引背食不消不能多食羸瘦短  
氣及癖爲熱膈耳寒熱外因必連脹滿憂悲內因亦  
須便秘其膈乃成可見結在上而下仍通結在下而  
上不闔皆不能爲隔惟上下交鎖鬱滯連衡始得就  
耳故噎不便秘僅可謂噎反胃自嘔不過反胃倘反  
胃不嘔又不能食噎且便秘胃腹不通斯則膈矣跌

陽脈浮而濇浮則爲虛濇則傷脾脾傷則不磨朝食  
暮吐暮食朝吐宿穀不化名曰胃反虛且傷脾是中  
焦病不得云下皖也然胃反吐而渴欲飲水者茯苓  
澤瀉湯主之其方較五苓散多生薑甘草而少猪苓  
不可見病雖在中實由在下水道不宣歟不與三陽  
結爲膈相連屬歟是反胃與嘔同形異治反胃與噎  
膈異病同情也然則外臺治膈八方蜀椒遠志乾薑  
桂心細辛無方不用何義夫膈旣方成胷腹閉塞自  
非溫開不能通達通達之後自有條理可尋乃更按  
證檢方剷除病本試思八方何無一方作湯服者凡  
如彈子僅服一丸如梧子者服四五丸至多以十丸

為率亦可見其意之所在矣

奇錄式陳利錄本始思入式何無一衣半

非謂開不請教致致教之於自存紉

對心則等無式不取何辨夫融融衣

謂其神同神也然限衣臺前融入衣

謂為融前後風煥長又胃與融同

不可長錄融在中寶由并不可水

融為長主之其式融正符精冬主

融融不融云不知出然自又起而

暮也暮食融也宿露不外各日胃

本經序疏要卷四

順流融齋限為朝朝融限不融融食